

兩浙輶軒續錄

兩浙輜軒續錄卷四十四目

洪昌燕 劉鍾祥 夏同善 於藻 趙佑宸

陳壽祺 祿慶 戴有恆 戴之恆 徐桂

吳淦 吳俊琪 吳春煊 孫玉檢 顧鏐

李敬釗 唐仁壽 濮陽芳 楊鳳翰 居鴻謨

查慶萱 郎璟 張恆 王澄 陸用瀚

吳起元 沈振名 許枚 倪廷祿 張士彬

章綬銜 蔡蓉升 楊寶彝 楊詠春 沈閩崑

錢廷綸 王庸敬 唐肇初 陳爾梅 張慶瀾

丁汝謙 孫垓 來恆方 錢壩 錢鎔

尤竟成 孫拱宸 余瀾 徐錦 陳銛

李廷獻 黃世善 周炳元 李大章 曹壽銘

駱乘輿

詹大開

詹大恕

曾諧

林大椿

楊詩

趙福雲

陶在均

陸秉鑑

鄭雲林

俞聘三

王紹祥

兩浙輶軒續錄卷四十四

督學使者潘衍桐訂

洪昌燕

字敬傳號張伯錢塘人咸豐丙辰一甲三

府志昌燕授編修後咸豐戊午充河南副考官庚申充
會試同考官所取多耆宿辛酉補江南道御史上封事
入條一京兵訓練宜精一京米招買宜亟一崇文門稅
務宜寬一山東省籌防宜固一河南四達之區控制宜
密一楚軍屢捷之後兜勦宜周一直省團練大臣不宜
復設一直省殷實各戶不宜勒捐同治壬戌督理五城
街道是年冬因雪澤較遲祈禱未應復陳時政闕失先
後疏入並蒙
嘉納甲子巡視東城因浙江收復海塘潰決條陳利害並陳
旨允行有德有言可謂不負所學矣

題乍浦營佐領果仁佈妻塔塔刺恭人殉節傳有序

道光壬寅四月西人犯乍浦果公出禦恭人患受辱

率二女投井死翌日寇退公歸卽井營兆事聞

旌卹如例海鹽徐槐庭爲之傳

人臣死國婦死夫綱常萬古昭寰區恭人慷慨識大義死節
特與常人殊壬寅之歲海氛急直犯禾中巨艘集夫君官禾
誓殺賊觀山灣前一軍立寇由閒道忽登城礮石齊發屋瓦
鳴麕奔鼠竄闖城出恭人激烈忘其生盈盈井水清無滓玉
抱冰心本如此夫君存歿未可知二女相將一時死無何寇
退夫君歸瀾翻不起心傷悲佳城卓立轆轤側煌煌
綸綍生光輝嗚呼恭人非有守土責死以報夫兼報
國墓門綽楔表清風下視鬚眉媿無色

陰平曉發

又上長途去行行趁馬蹏人將殘夢遠天入大荒低皓月澹
將墮黃塵濃欲迷緬懷袁太傅舊治覓碑題

懷吳閭莊敦

聚首怱怱午日過海天東望隔津河卻因把酒臨風醉回憶
論詩斫地歌絕代文章知己少中年游歷感懷多屋梁落月
思顏色李杜當年意若何

晚過鷺脰湖

平湖抱隄圓風靜息奔浪蒼茫一笠低四野浩清曠天容帶
暝色煙雲倏殊狀不逢打魚舟何從覓漁唱生平未遠游眼
界此焉壯祇饒客懷寬隨波共搖漾倚蓬梢移時鐙火指平
望

東軒吟社圖題詞

吾杭文物雄乾嘉堂崇小山齋瓶花琴臺詩翰亦照耀風雅
藉甚追西厓東軒吟社稍後起驛傍皇華指珂里藏書萬軸
富家傳壇坫崢嶸一時起主人謝官百事無箋注暇日吟朋

俱豪情北海徒尊酒雅集西園更畫圖
圖中主賓二十七美擅東南各無匹
一星終後吟事闌墓草雖陳蘭玉茁
無端烽火逼宣城大好湖山慘劫經
細縹摧殘六丁泣顧廚畫亦愁通靈
燼餘一卷行滕贖示我長安索題詠
裙屐遲陪老宿游丹青猶識風流盛
西泠舊事忍重論集檢清尊畫並珍
故家喬木人增感何況摩挲手澤人

送友人之閩

羨爾甯親向百蠻扁舟日下萬重灘
經過舊路吾能說雪浪屏山畫裏看

劉鍾祥

字乙藜錢塘人咸豐丙辰進士官刑部主事

杭郡詩三輯乙藜性情溫厚學識宏通得館選後改分

秋曹假歸辛酉

詔在籍紳士舉辦團練乙藜巡防北鄉守餘杭當賊衝苦戰十餘日卒以眾寡不敵赴水死同守北鄉者史廣騏朱

潤之沈拱元馬鈞
王錫隣皆死難

夏日田園雜興

連番梅雨灑芳畦處處新秧插欲齊最是荷鋤人獨立一肩
蓑壓綠雲低

南風吹袂覺涼生寂寂田園夜景清小坐不知明月上爲貪

閒話豆花棚

夏同善

字子松仁和人咸豐丙辰進士官至吏部右侍郎

張謇撰墓志公少穎異喜聞人說忠孝故事稍長益嗜學年十八補杭州府學生員咸豐六年舉於鄉明年成進士改翰林院庶吉士散館一等第一授編修升右庶子轉左庶子升翰林院侍講學士詹事府詹事兵部右侍郎兼刑部左侍郎調吏部右侍郎方咸豐十年西賊四張江浙郡縣土崩魚爛而督師大臣張國樑和春張玉良瑞昌諸公或戰死或罷或綴于分道之寇軍漢勢散汜敗無功公乃請命曾國藩總統諸軍以額節制自道光末年英吉利佛蘭西之禍始機牙于廣州當事者控馭無策海疆六七行省遂連歲多事北塘之役忠親

王僧格林沁既退軍通州而大學士桂良再就議款公度敵情叵測請專任僧格林沁率厲將士以備戰守慎不可終之約以杜覬覦疏上而曾公督辦江南軍務聲夷酋額爾琿反側之罪于天下其

詔命

海而杭湖與賊相搆挂久糧盡援絕公慨然與二三朋輩抵書曾公乞師援杭乞江蘇巡撫分所留粵餉餉湖時曾公頓兵祁門不暇兼顧湖餉亦不時繼兩州繼陷同治初公奉蕭太夫人北上服除仍官庶子屢疏請卹東南流民光緒四年奉

命視學

江蘇面陳捐輸妨政請停止越三日有

詔停捐復

命察視山東河決江南礮臺工狀公請疏濬下流修徒駭故

道停機器不急之費以移治河徒利津城緩徵濱河無田虛額之糧至江南疏論吳淞江陰焦山襟咽長江形勝要害宜重防守其江甯之烏龍山沙洲圩堂奧隱地一切可罷當時遽之按部所至人便其約試士輒竟日堂皇校卷至夜分不休薨于江陰試院年五十公既沒上在毓慶宮微聞其事一日問侍臣曰夏同善何似侍郎翁公以實對

上遽泣

侍臣皆泣公以忠誠荷

主知如此譚獻撰碑銘同治六年二月公在詹事任內上言禮貴因時請緩行幸聞

皇上將奉

兩宮皇太后幸停親王府又聞停邸傳集梨園

文宗顯皇帝嘗幸親王府矣今非昔比竊有未安

皇上御極尚在冲齡乃敬

天未至於

南郊而

游幸先臨平府第未安者一

皇上聖學功資養正不宜閒斷使耳目玩好之娛偶有所近

恐疏而不密未安者二方今軍務未平時多艱使以

游觀之事傳之四方無以慰天下臣民之望未安者三

朝廷英諸國之人近處京畿

朝者四莊敬日強彼始帖然折服稍示以解難免生心未安

皇上精心典學無時豫怠奉

兩宮皇太后臨幸親王邸第俟天下乂安

皇上親政親詣

郊廟行禮之後以次及之非時不舉古有名箴

行幸之議伏乞停止儻謂事難更改則易曰有過則改書曰

聖德之無窮公直言敢諫此舉舉大者又請撫卹東南被寇

難民光緒初又請籌卹山東河南流民時晉豫天災流

行道瑾相望因又疏請加振帑飭荒政以蘇民困畿輔

旱請開井以資水利又請酌緩災區下忙錢糧奉使四

川畿永川張事周京控案覆奏請全撤兵差局酌減夫

馬局蜀民大蘇光緒元年奉

兩宮

皇太后懿旨赴毓慶宮授

讀疏辭不許於是悉屏人事退食橫經史靜觀思所獻

納夙夜不敢康晏矣六年在江蘇學政任積勞成疾卒

聖學

因及機器製造之費征釐捐局之擾其耿耿未慰之心

在此數端密坐咨嗟誠有如此

古名臣所謂仰屋竊歎者

家傳略公在順天學政任內教士先行後文士多化之

所至裁損供帳約束僕從提學江蘇以吳中人士多吸

食鴉片煙者乃嚴檄各學諭禁之捐廉俸濬江陰城河

栽種松樹五萬二千餘株於君山導民樹植今居民又

呼君山爲夏公山

緝雅堂詩話子松前輩充講官日抗疏陳事匡正

君德中外傾慕旋入直

毓慶宮清操重望益爲朝野所倚賴視學江蘇整頓士習

衡校文字恆終夜不休年過五十竟歸長夜生平不以

詩鳴然讀和翁侍郎句云學問大原先定靜

海陵思歸

苒苒韶華似箭催無端滯跡海陵隈請纓空抱終軍志負米

還慚仲氏才十日雨剛滋麥秀幾番風又報花開崇川距此
無多路猶是門閭日望回

翁侍郎

同韻

以詩見示次韻書懷

日下祥雲捧赤曇鷓鴣亦傍紫鸞膠盍簪幸結同心契納牖
思參逆耳談學問大原先定靜

朝廷元氣是和甘生平奢願何由副渺渺前修待指南

邵汴生師招遊南淀觀荷次韻二首

雨後郊原入望青春風杖履喜先形人如杜曲簪裾集地似
岐陽囿沼靈苒苒花香空際挹依依田水靜中聽願推此境
周天下同上歐陽豐樂亭

出郭尋芳到水灣輭紅塵外卽仙寰臨流屋倩花爲壁隔樹
巒將翠作環欲辨已忘陶令宅相看不厭敬亭山曠懷今古

無殊致好與閒雲共往還

復次前韻二首

小霽天光四野青
芄禾黍地含靈
偶陪康樂遊山屐
如到坡仙喜雨亭
入座煙雲俱改目
親人魚鳥亦忘形
還期薄海和甘洽
社鼓鼕鼕報賽聽

圍坐平臨碧玉灣
仙鄉原不外塵寰
一溪流水鳴琴筑
四壁荷花舞珮環
自昔高風懷洛社
于今霖雨屬東山
聞公暢論皆名論
月出東林未忍還

白龍灣驗決口

漠漠冰沙獵獵風
黃河隄畔走青驄
一鞭斜日恩恩去
知在災民望眼中

題西湖春餞第二圖

茫茫世事驚炊黍圖開萬變成今古唐虞三代縱遙遙農桑
學校非無譜旋轉乾坤總在人女媧鍊石天能補兵火重經
感故鄉楚人一炬銷咸陽白骨成堆且不收世家法物灰飛
揚君常什襲荆關筆寸珠尺璧嗟淪失妙手黃筌有替人生
綃重展湖山色吁嗟乎武林恢復十餘載往歲規模幾多在
安得人人盡似君廢者舉之故者新豈獨西湖復舊觀行見
世宙登熙春

馳驛題示經過官吏

設官本意爲斯民饑饉年來況薦臻但冀茅檐舒疾苦敢將
供億累關津

於

藻

字文叔歸安人咸豐丙辰進士官吏部主事

送施怡雲明經南歸

平生文字交落落靜可數
昕夕念我徒憔悴人三五
惟子昂然來愛子不予侮
性情自高卓風誼亦純古
胸中無宿物何處容齟齬
予也素寡交世味良多忤
每念齊非偶歎息喻爲伍
四載共懷槩賴子以爲輔

天地非無才囿此眼界小
類首古人多傾心同輩少
學業苦無成歲月那不老
便便捫子腹書庫九經好
單辭必究訂百疑耐探討
子富如決川我學終潢潦
和兌行未疑斯事遽已渺
歸與娛雙親修身永爲寶

趙佑宸

字粹甫號蕊史鄞人咸豐丙辰進士

董沛曰廷尉生日與全謝山先生同舉京兆成進士入
詞林歲之干支亦同人以爲異院中撰文屢稱

文宗

意呼爲才子直

上書房諸王交相器重以贊善出守鎮江外吏十餘年游

特旨

陟大廣順道內召復直

上齋洵異

數也

緝雅堂詩話余在翰林梓甫先生爲教習師訓誨備至情誼甚篤記余使江西時路出京口先生守鎮江師弟相見歡話疇曩同泛船焦山過定慧寺摩挲古鼎流連斷碑清游可懷常在心目後先生內擢卿寺重直上齋方冀大用竟勤悴以歿披誦此卷如見齋齋翦燭深夜論詩光景淒楚久之

奉題

醇邸妙高峰留春亭圖

西山妙高峰峰峰筍張籜平生屐未經徒觀景物略我

王神理超幽栖於茲託海棠數十本雲霞何照灼結屋因巖阿面執巧相度邈哉神舉奧居然靈境拓公暇時一遊緩轡出西郭到此愜賞懷忘情珪與爵壺嶠在人閒奚必緱山鶴維王總神機勳名邁褻鄂胸中有甲兵豈但具邱壑身雖借巖棲心實求民瘼山農皞皞如相與安耕鑿爰知稼穡艱兼得林泉樂竟陵四時序山居有所作泉石卉木奇方茲

恐未若我聞偃蓋松數畝陰成幕又聞銀杏樹十圍根盤錯
雙泉左右鳴珠璣相噴薄金源香水院舊蹟應如昨披圖一
流覽遊興時躍躍何日得追陪遂我遊山約歷險乘籃輿尋
幽躡芒屨再賦記遊篇用以資大噓

題畫蘭冊應孚邱教

王者之香瑤華枝不與凡卉鬪芳姿蕊珠宮裏宅根固清馨
常沐春風吹東平爲善有真樂久而與化香不衰旁及繪事
亦奇絕喜氣拂拂揮毫時蒐羅畫冊足觀玩兼收並蓄洵無
遺一幹一花具生意此冊云是涪翁貽

謂恕皆前輩

畫者爲誰實

楚產沅湘澧浦有所思芳菲菲兮如欲襲生綃寫出靈均辭
裝成巨帙自珍重徧徵同好題新詩賤子幸侍經帷側同心
臭味無差池援琴愧乏幽蘭曲下里巴人空自嗤青蓮舊句

竊有取臨風可佩長相隨

焦山古鼎歌

昔我視學聖人邦獲觀禮器心則降丁酉己爵燦成列奇文

斑駁聲琤琤

衍聖公府藏商周彝器十事
廟御賜物也按試曲阜時獲敬觀焉

高

今我出

守來京口又見周鼎神爲雙形奇製古非近玩雲雷周币光

黯黹史游皇象不復作後儒窺測皆蕙撞世惠無專文互異

辨論嘖嘖徒紛曉挾剔根本賴博雅新城詩筆健能扛惟王

召史冊南仲頗側弗作爲駿厖用錫彤矢戈珣戟鑾旂鑒勒

干矛鏐篆銘在腹永寶用想見人厚工亦龐有明青詞恣饗

饗負之而去西渡江雲煙過眼覆公餗巧取豪奪何愚憊神

物豈爲權貴用言歸淨土伴經幢鈴山已同冰山倒焦山終

古長崆峒我來管領行自愧會當與汝居空齏摩挲吾亦愛

吾鼎賴汝永永鎮驚瀧

題丹陽魏氏父子殉難事畧

父爲忠臣子孝子但知忠孝不知死卓哉魏家橋與梓

解一丹

陽斗大城蘇常相脣齒保障及東南豈惟守鄉里卓哉魏家

橋與梓八年屹若長城峙

解二

庚申閏二月狂飈突地起將星

忽隕城傾矣大家世族紛遷徙苟免偷生實所恥誓不與賊

生曰有死而已

解三

忠貞萃一門四烈嶠不滓練湖水清且泚

清白之身有如此

解四

天語煌煌隆祠祀況有文孫能濟美闡揚世德徵銘誅大名

曰魏必復始卓哉魏家橋與梓秉筆書之舊史氏

解五

瑞邸樂循理齋遺稿題詞

一卷西園集千秋北海名渾忘圭組貴不輟誦絃聲循理眞

能樂論詩亦有情卽今窺大著猶若晤宗英

恭邸朗潤園圖

偉望河閒重名園

賜上方承

恩瞻地勝

題額仰

天章自闢仙源曠常霑

聖澤長三台摘吉曜六藝漱餘芳觴詠風前暢琴書雨後涼
心如明鏡澈胸有智珠藏畫境兼詩境雲鄉亦水鄉山居泉

石序不數竟陵王

陳壽祺

字珊士山陰人咸豐丙辰進士官刑部主事著纂喜堂詩稿

李慈銘銘傳略君本名源早喪母其季父文杰娶黃五月而婢無子祖命君兼後小宗黃撫之有恩君幼善病黃

日夕紡績以營藥餌顧讀書敏甚黃則并日而食為鍼
帶或數夕不寢得錢以給君入塾嘗自塾歸黃食之梁
肉問曰母食乎曰食矣及夜黃暗食廚下君持火燭之
則冷菜羹半甌麥屑也君持甌泣黃亦泣君既得官迎
養京師為黃七十餽君為余言之淚猶潸潸下也君
文章警敏尤喜為詩詞情藻豐發年少入翰林不得留
館職既改官勤習曹事日步行入署治獄夜閱爰書輒
至漏盡試軍機章京得高等竟不用而吏事益精曹中
疑獄悉委之又自授其三子經以其暇事吟咏治小
學以故年甫三十髮盡白積瘁以死年三十有九爾
潘祖蔭序略珊士余分校禮闈所得士也為人溫粹好
學不倦官刑部明慎折獄辛酉賊陷越州歸奉母居京
師五年遽殞其友賈主政樹誠周給諫星譽庇其老母
遺孤以歸并排次其遺稿屬余傳之余既悲生之遇猶
幸其文字
僅有存也

詹且讀

作周

招飲席閒話故鄉風景勞盍農乃逸

不勝

莊舄越吟之感作短歌解之

紅燭搖搖春酒香欲飲不飲愁故鄉勸君今日且歡喜杯中
卽是家鄉水

春日安肅道中

隄上濛濛吹白沙
鞭絲影裏夕陽斜
飛花十里官栽柳
孤磬一聲僧賣茶
隔塢小風傳鳥語
到門流水識人家
百錢沽酒不成醉
茆店疏鐙聽琵琶

新婚別

庭柯無獨枝
棲鳥有良匹
人生天地間
對面忽成別
昨日爲君嬪
一言羞未接
今日君遠行
送君不能泣
君行烽火中
生死難預必
妾幼不識途
望君空悵悵
但祝君平安
無憂妾存歿
存爲古井水
歿化山頭石
山水有相逢
助君南擊賊

漫興

剝啄從無客到門
深深幽草長春痕
文場屢誤新花樣
書味仍咀舊菜根
鐙下敲碁花落子
雨餘埽石竹生孫
人閒卽此

堪高隱何必桃源別有村

書上周氏姊

聖蘭

箋後

阿姊家居最憐我暫時分手亦酸心扁舟吹過大江天末
獨聽哀鴈音誤嫁已拌腸百斷別來贏得信千金無多骨肉
須珍重愁思年來各自深

病中吟

憂患攻一心勞苦叢百咎每聞作客難往往無老壽自我來
定州依人事餬口悠悠六百日臥病常八九搜方罄虛鵲乞
藥寶莢枸鬼伯赦腐儒轉輾死不朽熱如火焚身冷若水置
肘日重夜更劇氣逆時作歐脾虛瀉泄多捧腹下牀走屋旋
地欲轉身前足反後時當秋氣嚴寒聲栗窗牖尖風入病骨
血脈若刀割眼花燈不明膽怯月更黝宿草嘯妖狐枯星駭

荒狗變怪爭眯矇陰森溢鳴吼驚疑生各無魂夢幻諸有仿
佛到家鄉歡喜拜老母似憐羸病軀摩撫不絕手語兒今何
如問兒昔安否母言悽未終回頭見我婦蕉萃猶昔年酸心
到齋白啍啍兩兒子牽衣弄姿首無端忽驚覺枯鐙臥相守
可憐疾苦身猶是髮膚受昊天不可思何心自躑躅人生老
鄉里此意古所厚何時掉頭歸長歌揖鄰叟芬芬南山筍澹
澹東浦酒農事亦可欣良苗歲常取上有甘與旨下有草與
糗養拙終餘年力田不吾負

元日喜晴策馬定武東郊口占長句

輾輾香泥款款程東風暖入馬蹏輕自憐獨客頻年夢難得
新春一日晴煙外帘痕明野店柳邊鐙影畫山城阮囊賸有
新詩句排日清遊趁太平

留別賡元甫

殿

邂逅天涯締古歡
茗枰書卷共盤桓
黃華秋圃交情淡
紅豆春風別夢闌
令子如君傳業易
老親似我久遊難
明朝咫尺人千里
雙鯉殷勤且勸餐

美人背立圖

人面春風省識難
桃花深處背朱闌
待儂補畫紅芙鏡
寄語人從鏡裏看

明妃出塞圖

錦帔明璫出漠關
白雲回首失陰山
他年居次重歸漢
可有魂隨愛女還

冬仲十月夜坐青芙庵時將計偕北上言愁欲愁感賦

七古一章

獵獵北風窗紙破冷月潑階寒色大蛟龍百吼不耐眠一尺
長檠擁書坐昔年曾作長安遊風沙莽莽雲山愁眼看阿母
不敢哭淚痕濺透青羊裘今年又望長安走鐵鹿聲乾月如
斗手向牽牛借聘錢三百青銅纏腰後兒在阿母飢且寒兒
去阿母誰相看昔日淚痕今未乾念此寸寸摧心肝嗟乎著
書種菜計亦好丈夫何必求一官

情詩

胭脂花瘦曉妝慵黛合纔開又手封知道郎行山色裏朝來
不敢畫眉峰

春莫海上病起卽事

重簾猶是峭寒時怯怯春衫冷自支客裏光陰雙燕老病中
況味一燈知香愁細雨依人久花戀東風到地遲三月不堪

荒舊習朝來擬作餞春詩

嘉定道中寄懷吳小符同年

葉彝

側側西風吹酒卮天涯又過菊花時
新愁似水隨潮長短夢驚寒到枕遲
九月霜華侵客鬢一鐙秋影訂殘詩
朝來借問峴山令定有新吟慰我思

曉發魚溝

料峭春寒酒乍醒鞭絲扶夢指殘星
霜邊人語隨鐙遠澗外鐘聲帶水聽
林窄天光明馬背雪消山色上鴉翎
泥人猶有江南思十里垂楊踠地青

順河集同楊禮南同年

秉璋作

客裏風情強自憐月華如水水如煙
擁衾未慣霜邊夢小隊鈴聲欲曉天

暮冬旅夜詩以自勵

碌碌竟何補百年亦有涯北風吹歲暮老屋發梅花努力看
光景難副物華乾坤正多事未敢說思家

旅館夜坐得五古一章呈東鷗越縵子恂諸子

閉門寡所營夜靜百慮空方庭眷初月虛簷墮微淙獨坐生
古歡趣得境忽洞鑪灰養閒意銚聲學幽諷窗鐙炙疏影餅
花暖餘凍春氣搖薄煙寒香不成夢

武林沈某以杏花燕子便面屬題時閱杭州警報感書

一絕

荒城寂寂閉春星亂後蘼蕪任意青料得渡江雙燕子與花
相對說飄零

書李莚客越縵堂集後卽用集中疊王孟調

星誠

江椅

步月韻

至理本無隱元化抱其默詞章亦小道性分不可色求深意
轉晦學絕詣愈惜讀詩重三歎百年見今夕飄搖二三子吾
道良可識寥寥生死交殷憂繪君魄孤悰赴各悟千趣瑩一
得短歌發慷慨靈機不自寂悲愉無定聲意到境忽別此中
有真宰存者特其迹吾心如亂髮愁來詎能櫛長貧百事冥
生涯眾憂納難難重撫卷對之欲無說感此生道心日出天
地白

感事

許國無長技憂時有老親難難生百感出處重孤身吾道貧
中寄人情亂後真鑑湖如許乞心事付垂綸

浦江張烈嬭黃氏

琴徽

殉節詩

爲氏伯黃玉卿作

我昔乘舟淩斗躔海門白浪春碧天東來蜿蜒忽過峽尾波
抱郭開人煙江聲幽咽走灘急水石激搏含貞艱此中往往
有奇節浣衣老嫗能爲言嫵媚墮地志忠孝砥礪甯必非山
川長安城頭遇黃九一紙示我心悽然曰弟有女幼異眾么
桐彈角無懦弦三月張家作新婦白鸞銜經曉窗前倒心迴
腸不得死游魂宛轉還生旋咸豐己未斗指卯月廿六日三
更閒是夜星黑天無月鬼風吹火鐙譁誕手紉裳衣作生斂
問之不答惟涕漣斷腸一慟百脈絕筋骨解散如兜縣乃知
節義不轉眼區區性命非所難今年之江寇氛惡天狗夜墜
嘯聲酸女兒什百爭一死青燐繞屋飛作團乾坤正氣自不
敝血性所至無愚賢殉夫殉國各無負要以所遇行吾安古
來人心不能死苟有令德無弗傳況今

天子重名教煌煌

聖語褒幽泉誰與手持風化權行當爲君言

九乾

故鄉寇警後數月不得家書旅夜一鐙百感數啓用昌

黎示兒韻一首

骨肉寄語言所得亦區區誰令隔烽火并無盈尺書日我別
阿母涕淚常霑裾流離值患難念我還何如崔崔臥龍山下
有先人廬小園亦云好菰芥香可蔬蔭以百竿竹得筍肥且
麤欣欣顧妻子以爲阿母娛今年寇盜逼墟市無酒徒明知
殺戮慘猶望傳聞虛嗟我事薄宦覓粟慙侏儒家無五尺童
急切誰相於知否避亂後還似離家初不知母眠食遑敢知
其餘我身無羽翼從何問起居消息日干變安危不可虞皎

皎故鄉月明明照征夫故鄉亦不遠奈何限戶樞低頭看鐙
火豔豔花始敷似聞朝飛鵲噪我庭前株夜夢頻見之白日
忽已疏搖搖懸旌心愁來詎能祛憂思入冀幸恟恍難爲俱
長安無尺水何處覓鯉魚飄飄東南風儻肯借吹噓

六月十九日迎老母挈妻子輩自紹興至海上悲喜交
來龍鍾橫集洗觶上壽詩以寫感

快著衣冠拜老親亂離相見各聲吞眼前握手還疑夢別後
驚心不忍論十口可憐全性命百年能幾負晨昏天涯猶有
今宵酒淚點春暉其一罇

八月初八日奉母率妻子航海北還

萬里風濤記獨行今朝襍被又長征江南麋鹿飄零淚海外
魚龍戰伐聲性命苟全矜厚福治安無策愧科名養堂幸遂

孤臣志勉報春暉答

聖明

冬夜鐙下課阿鼇阿嘉讀書感興

長安風色布袍寒又見初梅小雪天
冷署茶香消薄宦貧門
鐙火惜殘年間裁舊判供詩草偶定
新花計俸錢珍重眼前
無限意亂離骨肉倍相憐

冬夜獨坐感賦

弱冠性不羈跌蕩脫天檢長貧寡所營
干失矜一慊無端嬰
世好利欲中以漸冷如魚上竹熱若蛾
赴焰求奢償每約境
捷步愈險方寸如瑾瑜愁病日雕刻空
山有隱者蓬門晝常
掩習靜逃人嘲居窮謝鬼諂粲然招我
遊臨風啟青嶂荷衣
翠欲折松屑香可點萬物自有餘造化
不能儉一笑還吾初

勿使白雲貶

冬夜月下偶成

暝行可十步過此心卽恐豈伊目力窮餘明不爲用開窗見
新月萬象入虛洞庭柯生薄暉簷花炙餘陳夜趣不可名濛
濛溢天空流光使人歡消息若余共生意赴眼前清思結幽
夢

老母請得四品封晉恭人詩以誌喜

藹藹春暉近

上林翟衣新換拜

綸音微官每爲親年喜

渥澤眞隨子意深錦軸琳琅

三殿字寒機鐙火十年心明時媿乏涓埃報一紙

鸞封值萬金

餞春感賦乞叔雲尊客和之

九十日春辜負盡不堪風雨對孤吟青衫黯淡留殘酒白髮
蕭疏上短簪夢裏鶯花羈土淚眼前眠食老親心天涯兄弟
還相慰鄉思朝來各自深

祿

慶

字縵亭杭州駐防滿洲廂藍旗人諸生著怡花館小草

緝雅堂詩話貴鏡泉贈縵亭詩吾友縵亭世寡儔丰神
麗落學業優年未三十俗慮休觀破富貴浮雲浮欣然
從事惟糟邱放歌不肯隨庸流論交惟我情最投三日
不見成隱憂一見耿耿明雙眸典衣沽酒先我留擎杯
大笑詩興適搖筆氣欲橫斗牛有時寂坐肆冥搜如蟻
穿珠犀燭幽有時高歌凌滄洲斷鴻驚落霜天秋借載
磊落胸未酬元龍豪氣空九州卽今自命醉鄉侯酒
杯在手心悠悠除卻吟詩百不求其爲人可想見矣

柳村小隱

人非懷葛與羲皇此地居然野趣長三板橫橋萬楊柳數家

臨水一茆堂聽鶯約客同春
讌洗馬攜奴趁晚涼
難得時清容小隱未妨閒臥綠沈槍

孤山琴敘

玉梅花放春猶早鶴守柴門冷不開
流水一灣晴雪外故人特地抱琴來

不學枯禪不學仙性情各寄七條絃
何當借取龍眠筆圖作孤山故事傳

戴有恆

字大年號保卿熙子錢塘廕生官江蘇松江通判著而璧齋詩存

杭郡詩三輯保卿天性純篤族黨無間言善書畫山水小幅疏秀似倪雲林暇輒以吟咏自娛

題陸小石丈退省圖

夙昔遊南屏道範良所欽
今茲來羅浮披圖挹素襟
古歌與遺訓宣示利斷金
進退貴得所顧盼兩酌斟
幽懷欣有託和

平契鳴琴如花之初開在春則爲陰有守固鮮失非同事浮
沈勞勞塵壤間鞭鐙馳危岑所涉非不高其奈憂患深何如
騎驢客攬轡發微吟回看行役者風雪苦相侵安得援以手
把臂行入林緬彼雲間族厯世縣纓簪芝蘭契同味庭竹多
蕭森晨夕數往還縱言古與今世途多險阻蹉跎日月駸愼
勿悔蹉跎鑒茲獲我心書紳願不忘永作座右箴

乙亥臘月次子兆春將應禮部試作此示之

頻年宦海逐浮沈報

國無才愧轉深我卻安貧甘淡泊爾須努力惜光陰他鄉飽
暖宜加慎獨處歡娛善自尋無事遣懷閒覓句旅窗且署北

征吟

戴之恆

字仲江錢塘諸生
箸延秋室詩稿

陳菽乳用樊榭山房菽乳詩韻

婁護集奇膳合作五侯鯖爲新當化腐昧者空譏評何人創
淨饌識味同簞鏗堅若石乳結凝如玉液精僅以一宿就乃
得眾美并嘗之淡而永視之澄且明柔膚暗生骨薄暈含微
頰維筐亦維宮入市于以盛濃調與淡煮充庖任煎烹常得
腐儒氣不愧寒士名服玉舊有方傳自虞伯生未諸飲冰術
空教酒屢行豈知陳痕綻益令乳汁清五都價亦廉店結茅
依城尋常非祕製力作悉嫫嫫方今天地肅時乎不可羸含
咀聊自得得此復何營

徐

桂

字馥巖號淶庵錢塘貢生官
德清訓導著一角山房詩草

徐恩綬曰從兄淶庵以與籌軍餉敘官德清訓導悉心
課士擇月課之佳者捐俸刊行日坐冷齋吟咏不輟
從嫂高氏哀辭有序

再從兄清淮字秋湖錢塘國子生無子早逝咸豐庚申二月二十日避寇江干至徐村三夫人廟告神投江死之

高氏媛嬪於徐如鼓瑟琴安厥居身何不幸而守此未亾人之廬解一妾無子矣賊紛至矣倉皇出走命當死矣行行至徐

村願得死所敢求生存解二三夫人廟峨峨匍匐入拜涕滂沱白日慘慘江不波解三被髮告神我逝矣清流隕身無蹉跎神

其鑒之志靡他嗚呼神其鑒之吾嫂之志志靡佗解四

吳淦字菊潭錢塘虞貢官嶧縣訓導箸康勝齋詩二卷

復堂日記吳君鞠潭以書名掩其文筆以文采掩其才性譚粹安雅古之君子亂後與張渠卿同賦絕句五十首紀杭城再陷事蓋詩史也

汪蓉垞大令通孫山水遺冊為哲嗣子用州守題

當年結契盡名流壇坫東南盛倡酬風雨清尊成雅集林泉
畫隱託高樓東軒自昔吟儔聚北郭於今亮節留

大令辛酉
殉難城北

孝友一庭豪士氣卽瞻遺冊亦千秋

陳紉齋

允升

畫贖

紉齋古逸士耳名三十年詩書畫三絕今之老鄭虔適來申
江游貽我畫贖編縱橫百六葉葉葉精雕鐫畫綜南北派落
紙揮雲煙詩詞及題語神妙絕蹏筌書復宗米董超忽凌飛
仙翳昔芥子園敢云差比肩畫理暨畫法一一奧竅宣津渡
逮後學祕鑰開前賢是謂必傳作流播訖垓垓我今再三讀
海月懸中天

得王松溪大令

麟書

詩簡

卅年風雨契苔岑自別西江契更深未必故人增厚祿每從

兩浙輶軒續錄

卷四十四

吳淞

吳俊琪

充

遠道餽兼金小安已奏循良績大有先舒撫字心一紙書來情鄭重嶺梅開處快披吟

吳俊琪

字半耕錢塘諸生
箸至樂齋吟稿

許仁杰曰半耕富於吟詠積稿累寸與山
陰陸廉史壽臣交尤摯病時以稿付之

村居寫懷

陽春蘇萬物大地呈貞元時雨催東作布穀曉郊原小憩柳
陰下相與同笑言安分謝寵辱守拙棲田園雞犬有閒趣輪
蹄無俗喧農桑足衣食何處非桃源俯仰樂何極古道懷義
軒

江樓秋夜

涼思滿煙波倚樓聞櫓歌萬山圍澤國一水接天河樹老知
秋早江空得月多美人碧雲隔相望奈愁何

秋夕夢游山寺得山字一聯醒而足成之

峯頂秋寒木葉斑一聲晚磬出禪關
茶煙白湧鐺中月蘚石青蟠
殿底山僧飯分供檐鴿飽
佛花不禁洞猿攀白頭老衲
燈前坐笑看閒雲自往還

吳春煊

字榮百號次
榆仁和諸生

寄何侍御璟京師

折得寒香驛使催
臨緘無限意低徊
故人漸共梅花老
消息春風來不來

沿山

輦路敲斜舊跡留
浮家處處覓漁舟
無情祇有沿山水
照出蘆花盡白頭

書濟南芙蓉巷寓壁

浪跡年年百不成
歷亭秋老罷詩盟
兼旬作得芙蓉主
錯被人呼石曼卿

孫玉檢

字仲雅仁和諸生著檀弓正誤二卷懸腕論一卷

吳山四太尉歌

吳山山麓東嶽宮
烏金范象光熊熊
擎拳怒目怪而醜
欲附泰岱同尊崇
舊傳浮自江之澣
鱷蛟駭躍魚龍舞
金牛自古見西湖
丁甲原堪來水府
綳縵香火禱且祠
神之靈兮福四時
崇楣側傍留侯廟
遺跡重探聖母池
池旁兀坐偉軀四
好事有人尋款識
元祐某年三月時
三十有三銘背字
捨者吳顧沙河民
造者俞郭治戶人
沙河與江實咫尺
浮來之說非無因
當時定見蘇太守
惜哉未咏詩一首
幸有施公證宿聞
著入圖經傳不朽
臨安施志文久湮
頑鐵無語年復年
彥狎

一疏化重鑄但表靈異如銅仙禦災捍患昭明畏爵以列侯
官太尉午夜示夢王子澄此身不恃堅金貴又經劫火幾滄
桑增四爲五神五方韓門綴學好鑿空證以四聖歸延祥何
如樊榭詩中傑咏古不敢參臆說雖非冷面寒鐵公冤亦能
伸枉能直我爲爾發前後疑更爲爾作迎送辭幸爾不鑄佞
人象長跪岳鄂王堦墀嗚呼爾且處廊廡鐵案可翻冤可訴
哥哥之稱例萬回錚錚之質自千古

顧

鏐字子眞
仁和人

壽松堂詩話高昭伯譚滌生並少負異才一日滌生以
顧子眞詩來質則才氣過人與高譚鼎足而三詢其年
猶未
冠也

同人遊南屏山訪友

言訪西子湖山形何婀娜雙峰雲物佳六橋煙柳鎖行行重

行行足疲力無那方疑路在前忽又拗而左塍荒溝水咽人
瘦山影裏相攜入田家質樸無爾我樽酒聊共醉盤餐雜蔬
果籬邊藹眾綠時有碎紅墮搖竹竹影移折花花枝安日暮
客思歸隄邊喚魚舸

口占

敲門風似催租吏出岫雲如入谷樵萬樹梅花寒又勒斜陽
還帶雪花飄

李敬釗

字醒庵
仁和人

浙江忠義錄敬釗以縣丞分發江蘇丁繼母憂回籍二
月十九日寇至敬釗分領清波門黃泥潭守城團練二
十七日地道轟裂民團多死遂遇害僕王福殉及辛
酉再陷妻錢與孫應榆應程次媳唐孫女順姑皆死

輓湯貞愍公

妖彗市城城忽裂夜深天狗饒人血將軍歸老三十秋養得

寸心皎冰雪彎弓說劒癖耽詩將畧儒風兩有之秦淮岸旁
醉踏月秣陵山畔笑拈髭賢哉據鞍鬢鑠翁上馬下馬驕春
風承家忠孝本無玷披肝瀝膽誰能同閒摹陶杜寫艱劬隱
括平生出處殊一百八首偉然在寶如顆顆牟尼珠最後四
十字能撐宇宙義僕當時負以走不比尋常絕命詞暗中森
有鬼神守可憐赤手難擎天提刀殺賊誓猶堅此身休矣此
性烈骨肉捨去又況文字緣寺門之水冽且泚慷慨激昂決
一死從容攜杖赴清流號泣相隨女公子城破家亾喚奈何
天留萌蘖養巖阿

旌閭表墓慰忠藎俎豆春秋世不磨吁嗟乎公誠有子恨晚
見濟美非徒名筆擅遺編甫展公像新英雄浩氣書生面碧
血欲凝字欲舞籌鐙讀罷淒風雨美人香艸屈靈均雅歌投

壺祭征虜六朝形勝尙豺狼
年去年來弔夕陽
願醉寒泉薦
秋菊祠堂高並水仙王

唐仁壽

字端甫號鏡香海甯諸生著謳字室詩稿

府志仁壽生而穎異自幼有神童之譽嘉興錢泰吉官訓導喜獎掖後進得仁壽大異之乃益發憤究心六書音訓之學雖校經史文字疏謬舛漏毛髮差失皆辨之既經喪亂志意蕭然好讀書如故篤於古誼今之人不能及也

許仁杰曰端甫年十四卽入庠讀書好古究極名理從錢警石司訓游益聚書購宋元善本參校同異警石深契之後入金陵書局頗見重於曾文正與南匯張嘯山同校史記著有札記

論六朝詩絕句仿元遺山體

山水清音妙自然
太冲才調自翩翩
小山叢桂留人處
應笑淮南未是仙

艤舟牛渚發清吟
卻遇將軍是賞音
秋盡江空誰解聽
月明

祇鑒兩人心

客兒文藻擅芳馨範水模山損性靈再拜廬陵王墓下淒吟

應亦淚雙零

栗里爭傳隱逸風河山舉目感無窮荆軻不返刑天舞都在

先生醉眼中

靖節非無志於當世者其隱退自得行藏之正詩多見道之言其詠荆軻讀山海經則雄心偶

露處也

拈來競病卽成詩天與英雄此段奇大野穹廬歌敕勒幽并

精悍可能追

齊梁宮體劇風流玉樹歌殘處處秋江令歸來頭白盡不曾

著句已生愁

唐人多尊江總杜云遠愧梁江總韓云久欽江總文才妙然詩在唐時存亦無多計歸來便輟

筆矣

北朝人作南朝客詞賦江關老可憐畢竟才華高六代青晴

兒總讓先鞭

徐庾並稱然庾勝於徐不獨以其詩也駢體亦然

昔昔鹽爭好句看言情綺麗若爲歡一篇頓蕩淋漓處始信

男兒是木蘭

木蘭詩無作者名氏亦莫定其時代近人攷爲隋時人甚鑿鑿

送桂皓亭孝廉歸廣州

南海得惠公古學始盛昌厥後阮公至遂開學海堂炎州蘊

瑰瓌詎獨財賦置桂君古之士著書滿行囊比來建鄴城解

后傾中臧元侯有嘉命注疏重刊行

湘鄉相國欲於廣州刊十三經注疏屬君校刊

往時臧徐輩

阮公門下校刊羣經者

君也虎力當督儒不聞道蔑視漢

與唐科日誠足貴經訓亦已荒足已不下士曉曉今之狂我

謂不足責祿利固其常君聞笑而領論議爭軒昂秋風颯江

關明發將還鄉一見如舊識欲去何能忘吾道不孤立達者

期自強立志苟相合弗恨天一方儻逢北歸雁靳君惠瑤章

濮陽芳

字彞齋海甯諸生

蔣學溥曰彞齋富於藏書警校精塙與同邑唐端甫仁壽爲錢警石學傳入室弟子學詩於應笠湖明經火盡薪傳淵源有自

甘泉師冷齋勘書圖遺照子密世兄屬題

大雅嗟不作後生乃盲聾海邦地孤陋披拂懷春風昔歲師秉鐸我州日再中當時言津寄邈然世儒宗舊德富收藏圖書浩盈充琳琅二萬卷擇精警校工完士與侮食偏端發愚蒙匠成出翹秀風教宏學宮聿觀勘書圖棲心足三冬嗚呼卅三年禮教肅雍雍末學坐廢棄按之就陶鎔幸從得親炙黽勉知磨礪

師範曾未遠師言記能詳懷鉛念落殖默默慚升堂厚價但耳食難云書善藏千元敵百宋佳話聞尖陽所貴人善讀異

同羅丹黃時於一字中古人雪謗傷

鄭康成戒子書衍字

尤求實事是

非徒免荒僉不然蠹魚老身世殊恐惶此理了可悟濟人乃有梁況乎文獻徵爲德於吾鄉海山何蒼蒼兜率何茫茫云何思報稱禮惟隆蒸嘗

楊鳳翰

字抑甫海甯諸生著鏡海樓詩集

錢保塘序略抑甫之詩于時事之屯否將帥之賢愚揮寫盡致豪蕩感激如置我于天寶貞元時也

海昌新樂府

逃兵來

毒龍嘘雲雨不止一城斗大礮聲死江潮怒湧如奔雷沿江但見逃兵來逃兵來勇孰賈衣製籠東如病虎村中雞犬不敢鳴坐使萬家斷煙火入我室操我戈搜括不異紅巾過意有未足將如何請君且勿嗟如何子女玉帛紅巾多

刺史走

刺史坐堂皇兵衛儼戎行刺史乘怒馬前驅皆戎裝刺史日
日事籌防嘖嘖刺史萬夫望一朝逃兵滿江滸夜雨涔涔斷
更鼓刺史不見空官府逃兵去如鷹飽揚刺史仍來事籌防
吁嗟刺史萬夫望

答妹夫羊辛楣茂才

復禮

餘暨見懷之作

得見翻成別相思各異鄉書來知鄭重讀罷感蒼涼歌哭風
塵黯閒關道路長吾生多涕泗中夜起徬徨

蹤迹秋蓬轉飄流媿此身因人拋骨月多難賴交親離亂書
難準艱危語倍眞全家今累汝凝望一霑巾

海甯州吏目劉君殉節詩

君諱立珣湖北咸甯人

大吏迎降免胄趨孤懷獨爾矢捐軀成仁特以微官重仗節

還看故印俱萬古衣冠留正氣一時首鼠媿當途忠魂長傍
皋陶廟齧齒應從地下呼

居鴻謨

字蓮浦海甯諸生著藝蘭山房詩存毫餘吟

家傳略蓮浦性仁厚好周人急暇輒吟咏與仁和馮文介同里應笠湖交善益勵於學有藝蘭山房詩存四卷許農部辛木為之序未燬於兵燹晚歲不經意之作子育馨哀集成帙存毫餘吟一卷年七十九重游泮水卒年八十五

秋夜不寐

夜半不成寐披衣起看星歸心逐去燕客思冷枯螢多難頭
先白他鄉眼孰青華胥尋一夢信手紙窗局

遣興

天涯何處任徜徉兩鬢飄蕭歎夕陽敢說忘情希太上何妨
高臥傲羲皇一天烽火且行樂十里笙歌不買狂獨有吟懷

消未得詩肩高聳短檠涼

查慶萱

字恩波號雅園又號念庭世禮子海甯諸生

和陳大宗師

用光

詒經精舍謁朱子祠原韻

表章崇六經肇自漢武帝收拾煨燼餘錯簡明堂位集註始
紫陽千古有定議源流探孔鄭邪說掃讖緯晦木懷師傅佩
韋有心契精舍名詒經寒泉堪比例性理纂精微道統得所
繫異哉傳習錄專重良知字緒山與龍溪實悖朱子意薛胡
四先生正學紹洙泗後起張楊園惜未崇祀事人齋我鄉賢
淑艾私自肆下學有遺編爲學先立志祝人齋先生名淦乾隆丙辰舉人規言矩
行誦法儒先所葺下學編萃朱子之精義共六百九十二條淑艾錄皆楊園之法言共三百九十五條體同近思錄

耶

璟

字子魯餘杭歲貢箸寄生草

登君山

我生在洞天我遊至福地君山十二峰峰峰皆蒼翠榜人導
我前予予沙草際麥秀山下田酒熟山中市登峰望洞庭入
廟讀碑記雲覆黃帝丹竹染湘君淚世變幾滄桑亭臺半荒
廢我來方仲春桃李得生氣佳茗吐萌芽新筍饒滋味長風
橫江來曠然發遐思茫茫天地閒蜉蝣一身寄

張

恆

字月如嘉興人著紅薇山房詩存

哀感錄月如工詩旁及繪事卒年甫二十已有一天星北拱萬里雁南翔之句頗不類短折人語

南湖卽事

湖邊花事又將過燕子歸來識舊窠怪底碧桃零落盡一春
風雨者番多

王

澄

字清宇號橘堂秀水貢生官嚴州訓導著橘香堂詩

家傳畧橘堂隨侍燕齊克紹家學秉鐸台嚴諸郡邑詩格在香山眉山之間士林爭傳頌之

遊叔祖司農公小圃題桃源洞

古洞窈而深
泠泠澗水瀉
絕壁何崢嶸
雲氣繞其下
石隙清風來
高臥消長夏
桃源路自通
誰爲問津者

陸用瀚

字季海
海鹽貢生
箸儘餘小草

題張鐵橋畫鷹

虛堂倏忽生秋風
白日不雨煙濛濛
鐵橋道人性驍騰
喜拈秃筆畫蒼鷹
生鐵百鍊雙爪立
殺氣直射天無色
開窗拂絹眼未轉
飛鳥驚駭落天半
陰山八月大雨雪
老樹皮死凍欲折
此時翻空一高呼
五更毛血月模胡

古鏡詞

懷中有古鏡藏之三十年
願以贈美人
美人隔雲煙但恐倉猝投或致恩義愆
古鏡古鏡爾何拙
願得一朝生羽翼飛入

九霄作秋月

吳起元

字秋浦海鹽諸生
箸小舟詩草

武原竹枝詞

四面青山入畫圖永安湖比小西湖曾因高士句留迹留得

嘉名擅海隅

關中高士孫太白僑
居湖山又名高士湖

鴨餛飩久箸鴛溪絕好詩材莫與齊不道杜家兒女巧新翻

食譜試柔荑

木筆花開燕子來馬明王廟一齊開蠶花儂命今年有剛向

黛頭賣卜回

嶼城鎮窯上沈
姓賣卜最神

沈振名

字蒲船
石門人

府志振名偶儻精繪事山水宗王麓臺書
法逼真薰香尤工篆刻有求是印存

遙岑挹翠樓同夢花臨畫作

綺窗四面遠峯環
日日樓頭遣興閒
卻喜煙霞時供養
一枝枯管擬荆關

許

枚

字萍江平湖諸生
著塵夢庵詩存

寓齋卽景

紅催殘照下晴寮
一碧林陰淡欲消
山郭水村成畫槩
松風蘿月入詩瓢
吟成硯北題蕉葉
酒酌籬東酌菊苗
指點茶煙輕颺處
數竿修竹共飄搖

朝聞鳥鵲噪簷牙
門對南山望眼賒
徑僻不來王謝燕
晝長閒品陸盧茶
曲塘風戰枯荷葉
隔隴香紛早稻花
一味新涼秋有信
果然先到野人家

沈廷祿

字培甫號吟樓平湖
諸生著抱膝吟草

久雨喜晴

一夜檐牙寂不譁忽驚晴旭滿窗紗岸添四五尺春水園放
兩三枝好花穿樹鵲聲聞喑喑上闌蝸篆認斜斜故人有約
踏青至命僕前村酒預餘

張士彬

字硯史桐鄉貢生
箸多林居士稿

縣志士彬幼承庭訓篤志好學詩文雅有法度生平持
躬儉約秉性端方爲鄉里所推重咸豐庚申寇至毅然
不避賊舉矛貫其胸立死

七夕

夜色冷如水明河秋不波人從牛渚渡花送鵲橋多瓜果紛
酬贈笙簫雜嘯歌孫樵不解事乞巧對如何

章綬銜

字紫伯歸安恩貢
著磨兜堅室詩鈔

縣志綬銜好聚書熟於掌故于鄉邦文獻尤爲諳習同
治閒與修府志訂訛補闕屹屹不倦詩宗唐人畫法山
樵皆能具體精於鑑別著有
辛復廬筆記書畫錄等書

送于文叔孝廉北上

連雲烽火未銷時，贈遠聊憑春一枝。動地鼓鼙征客淚，隔江

梅柳送行詩。欲全仙眷知非易，藉慰英魂莫任遲。小坪已邀賜卹而

眷屬仍留保定君此去擬遣南歸他日營田來穎上，結鄰休更賦將離。

蔡蓉升字雪樵歸安諸生官桐廬

李宗蓮跋雪樵晚就教職品學交飭及門甚眾所著有雙林記增纂十二卷梅花山館古文鈔四卷吟餘偶存

卷六

同人留修雙林鎮志不得赴滬上詩寄諸友

一雨滯行程，懷人夜幾更。時艱仍作客，春盡怕聞鶯。未了塵中事，皇知身後名。遙憐歌嘯侶，離散不勝情。

東塘阻風

水聲澎湃拍江濱，一夜扁舟宿白蘋。料得草堂風雨裏，倚門

愁殺白頭人

送春

昨夜荼蘼已盡開
無端春恨雨中來
簾櫳隱隱燒銀燭
庭院深深黯玉苔
各有華年驚一箭
且憑濁酒醉千杯
牆頭鶯燕紛紛甚
坐笑東皇枉愛才

楊寶彝

字注甫號抱山歸安諸生箸抱山草堂詩存

鄧臣若軍門殉節黃池丁巳十一月十二日事也詩以志感

捲地妖氛埽不開
宣州城上角聲哀
虎頭空負封侯相
豹略爭傳大將才
此日旌麾虛夜月
當時笳鼓動春雷
悲詞莫怪多慷慨
曾入蓮花幕府來

翦燭深宵坐論兵
之江門戶仗支撐
數行淚爲思親灑
軍門時奉

母諱墨經從戎每以百戰身惟見賊輕碧血淒涼魂化厲黃
父老不能歸養爲恨池鳴咽水吞聲皖公山下風兼雨遺恨千秋總不平

客有談徐中丞有王殉難事詩以哀之

雲川落大星賊鋒不可制誰爲棄車走成此破竹勢金閭雄
東南顏雲歎蔽翳錚錚徐中丞時艱獨零涕危坐清德堂指
揮散羣隸堂下水一泓清德庶自勵夫人公子女從死後先
繼忠孝萃一門名節照四裔豈無袁克徒殺馬毀玉墜階前
地盈尺蓬顆孤墳蔽我與公同鄉雲泥乏末契知公富三冬
學問有根柢理窮造化初識究天人際一語豁羣蒙秋霖見
新霽祇憂天步艱肯爲身後計爪透魯公拳血灑睢陽背黃
腸備哀贈青史榮後世紛紛屋底官慚顏悔臍噬

讀華亭雷葆廉所書婁縣知縣卞小雅乃誦殉難始末

事彙括其詞以詩哭之

祆星夜半照天紫
松江城上鼓聲死
闐然一賊馬絕駛
手執黃旗目上視
相近大橋尺有咫
下馬插旗若有俟
卞侯赫怒攘臂起
揮刀刺賊如刺豕
一戰再戰敵皆靡
後來大隊不可止
眾寡不敵可知矣
急退入城城已圯
大呼百姓向東指
從此路去有生理
回身罵賊碎嚼齒
血肉狼籍污泥滓
雷義所紀事止此
令我讀之淚滿紙
侯昔少年富文史
筆力所到走犀兕
京口從軍將十祀
一官百里去年始
官清只飲松江水
吾聞松江達官車
接軌爭出近關比
比是又聞五營兵
馬東南峙臨時不
肯遺一矢侯所練
兵三百耳誓以死
守危城裏侯之忠
貞古莫比鄙人識
侯在鄉里鬪酒論
文各翹企侯今大
節日星似哭侯以
詩頌有泚何時得
返蒼溪溪一盞寒
泉

薦芳芷

憶五弟 峴

最憐瘦弟三年別雨雪梁園寄此身有限年華長作客無多
骨肉各依人何時陽羨田同買迴首池塘草又春欲寄音書
愁不達柳城南望總傷神

楊詠春

號笑山歸安諸生
箸稻花香舍詩鈔

秋夜有感

兀坐又涼夜當秋感易生鐙光明四壁蛩語到三更累重愁
兒女才疎愧友生高堂幸健在何以博微名

朱立庵

福基
久之 福澄

兄弟擊賊不克焚死詩以弔之

大呼殺賊碎頭顱慷慨捐生兩丈夫譟出聲中人去也不堪

重展九秋圖

去年久之爲
余作九秋圖

王把總

龍彪

全家殉節湖州先是王賣藝江湖爲趙忠

節賞拔遂效死奇士也

鏖戰名齊王鐵槍順平仗汝守巖疆戈橫子夜嚴刁斗援絕

申江斷糗糧難得迹從游俠起居然身與此城亾達先迎虜

嗟何益愧殺孤熊殪路旁

畔將熊得勝開城降賊伏誅海上

沈閭崑

字肖巖德清廩貢官上虞訓導著來青軒詩鈔十卷

書馬元調簡堂集後

揮毫秀削柳州長巽甫工文出簡堂授筆多才稱博洽讀書

種子許精良寫來古雅橫山記藉甚賢聲瀚海翔師法子柔

能入室不徒門徑接歸唐

錢廷綸

字掌史號盧叔慈谿陳生著玉丁東館詩集一卷

董沛曰掌史家素豐遭亂中落處之晏如兄弟皆蚤世撫視孤姪恩意周篤士林稱之

古意

亂鶯不住啼楊花不住飛楊花與亂鶯相送春光歸春歸會
又來郎去何時回願言春少待爲我通微詞詞中無別語但
道長相思春風會我意習習吹裳衣我衣雖已敝昔日郎所
遺

慈湖晚步

夕陽全在水人影不離湖秋色一天淨涼風四面俱泉清魚
可數山暝鳥相呼不覺留連久歸來日已晡

秋感二首

十年萍梗遍天涯賸有閒愁付酒家顧市郎今無伯樂憐才
自古少張華渭城舊曲歌楊柳湓浦青衫感琵琶世事升沈
君莫問門前聽賣故侯瓜

市地秋陰楓葉下一天微雨菊花開驚看時節催人老漸覺
霜華上鬢來妝閣夜寒刀尺緊山樓風峭角聲哀年荒況復
逢時難潦倒何心數舉杯

王庸敬

字聖傳號簡侯
慈谿諸生

錢太守眾樂亭

雙橋跨岸水潺潺亭在南湖杳靄閒行樂不將民事廢題詩
親寫宦情閒碑文剝蝕憐安簡遺址恢宏藉謝山刺史風流
今已渺隔欄忍聽櫓聲還

唐肇初

字子庵奉化諸生

書樓晚眺

小樓人倚夕陽斜江水迢遙捲暮霞煙鎖蜃門波十里市喧
蜃海路三叉隔牆山色潑寒翠近寺鐘聲催落花坐久已忘

天欲暝飛飛歸樹又盤鴉

陳爾梅

號復齋山陰諸生

贈王梧石

滕王閣上題詩遍又向山陰買棹來
縞帶論交雖有願錦囊贈句愧無才
最宜風月君如竹能傲冰霜我是梅
相見恨遲離別易驪歌欲唱幾徘徊

病餘賸取骨珊珊塵世從來一笑難
萬里思親書半紙八年寄食缺三彈
休言咳唾成珠玉未解胭脂畫牡丹
寄語詩人如惜別好來吟館共盤桓

張慶瀾

字海鵬山陰諸生著梅鄰詩草

王繼香曰先生工八法又擅詩詞豪于飲醉後援筆成篇跌宕自喜顧困頓名場晚年尤貧悴鬱伊以終

醉草行贈王生子獻

鍾張旣亡邈斯遠江左風流祇義獻蘭亭醉本長寂寥會稽
墨妙幸重見王生家住戴山麓學海詞源並浩瀚興來鑿落
賭三千醉後赫蹏揮十萬蹲蹲狂舞頭濡墨鼠須橫掃驚溪
絹健如層霄摩蒼鷹逸如平沙落秋雁徐如元豹隱宿霧疾
如金蛇掣流電瑤草琪花帶月開萬馬千軍擐甲戰酒氣拂
拂出十指墜石驚雷極變幻時因道士寫黃庭偶爲羊欣灑
白練八法戲成五雲字百錢競市六角扇懷素重開蕉葉菴
智永幾穿鐵門限一珠一字殊足珍漫數南金與東箭我聞
王生世家學祖庭兩代書名擅擘窠大字魯公碑蠶眠細楷
閑邪卷令曾祖星階贈公隱居不仕善作懸臂書令祖而翁
裴山贈公博學能文小楷絕似閑邪公家傳而翁
藝苑推高宿過庭書譜臨尤善尊甫杏泉廣文嘗臨更聞竹
孫過庭書得其神似更聞竹
林阮步兵馳騁縱橫弄柔翰念亭茂才尤工書大蘇遺墨猶
爲生再從叔父

淋漓

令兄根仙文學書絕類柳公權惜早歲不祿亦子門下士

小宋搦管更清健

子詒令弟初學

執筆即渾勁可喜

乃知一門聚風雅不媿傳家有祖硯況君弱冠登

賢書蚤晚簪毫侍

金殿自來險峻歸平正好學誠懸以筆諫草聖若乞酒泉郡

糟邱定入毛穎傳嶙峋椽筆架崑崙汪洋積墨傾銀漢青天

萬里蔚藍紙一任金壺灑爛漫壓到墨林三百輩奚論道州

一何晏

謂子貞先生

媿我學書四十年墨猪詒誚每顏汗文通才

盡筆花落取譬青藍吾猶羨君不見書名終古屬王家天與

醉顛三寸擘

生自號醉顛

丁汝謙

字仲泉號吉菴會稽廩生

題錢雲颿荷笠齋吟稿

直書胸臆作狂歌斗酒篇詩逸興多解道文章崇本色肯因

雕琢失天和

風雅都存樸實中裁縫迹盡見天工探囊賸有邱遲錦羞向

三春翦翠紅

孫垓字子九曾稽諸生著退宜堂詩集六卷

孫德祖傳畧先生工為詩道光朝與故鄉名宿舉詩酒之會迭主齊盟所謂言社者也咸同之際經寇難家中落復就皋中諸時彥舉皋社社友相繼取科第或假他途登仕版先生卒不遇一為閩游歸而客茗雪齒就衰矣故人周叔子常濟其乏絕聞先生篤老益資之千金乃得歸老於家有詩且千首自同治以來日弩末集前此燼於燹者曰琴尾集今存者若干首幼眉刪定之卓卓可傳先生志潔行芳介中和外當其悠然高詠聲出金石未嘗知人世之有窮通得喪也而其詩夷然清皓適肖其為人烏虬遠矣

九日偕悉伯過叔昀東鷗草堂限九字韻

老子年來不得意數數高眠過重九去年李生來打門拉走南塘及村後秋晴草輦足力健百市寒山午至酉飢來買饅

亦自飽落日空田不思酒今年相約過芝村宵雨晨晴天亦
偶周君兄弟稱好客累爾東鄰貰一斗菱芡在陂桃李野船
載魚鰕滿溪口端居不用言少錢眼見江鄉富無右夫容作
花大於手籬鞠初黃照虛牖人生不死須爲歡此會今時豈
常有

十月十日偕雪甌飲叔昀芝村寓園卽席呈諸子索和
十月雨如梅雨大愁陰一事不可作

去聲

東鷗主人窮鄉居放

眼青天守寒餓雪生昨自都門來解裝嗒臥心死灰我亦蹙
蹙不稱意拉爾且倒江邨盃草堂沈沈夜然燭脆韭登盤釀
初熟天下幾人有此閒吾輩安然飽新穀東南千里蟠賊營
河北又見無堅城漁陽一步根本地豈可復使縱橫行滿堂
話此慘不樂徑欲停鐙罷盃酌乾坤戰鬥甯易知未必微軀

竟溝壑人生此日宜散愁狂歌激越天風秋糟船百斛出海
上會當痛飲死卽休

登塏影樓望城南作

長干高塏倚斜曛山勢眞從雒下分此處祇宜常飲酒眼前
多少可兒墳

燕子磯

危磯直上振衣裾烏底江光晝不如落日微茫極湘漢亂山
蒼翠入淮徐數來往蹟三分後望裏名城百戰餘欲下盤陀
風正緊石根翻浪起龍魚

青遠閣題壁

雨戢風檣織似梭小闌干下是官河卽南宋時御河而今過客蕭條

甚欸乃聲來腳漿多

鄉人搗製腳漿船三十年矣
前太守鐵孫徐公曾詠之

題畫梅

臨池拂素寫冰姿，隱隱香來鼻觀知。
記得城南高閣夜，寒煙殘雪讀書時。

朱文懿公道遙樓古梅一樹，余少時讀書其上。

飯牛

遙山一角明夕暉，柳下浮鼻烏犍歸。
堂前瓦盆進脫粟，人坐菜畦先洗足。
田荒日永牛苦飢，毛拳喘急行步低。
呼兒莫飯莖乾草，飽喫入闌令早栖。
闌邊勿使蚊蠍侵，熏煙換溼皆關心。
不見人家劓深土，種作無牛更辛苦。

飼蠶

溫房堆葉沙沙聲，比戶養蠶牕紙明。
暖怕聞雷寒怕雨，晝防蒼蠅夜防鼠。
上山已近葉未賤，俗呼桑爲葉簇，蠶爲上山。謀向街頭典釵鈿。
少婦製衣遠寄夫，小姑得絲添嫁襦。
同房眠起各心事，背

卜鐙花籌有無縲盆乍歇人倦睡縣吏打門催早稅

種魚

魚秧買得秧鍼長雪片瀉入春波香落日一鐙明水際竹瀝
蘆簾風細細守以跛鼈魚不飛遊行晝夜看漸肥有時雨稀
湖面綠暖影瞰空魚料足老翁蕩槳日幾回盼魚苦於盼新
穀衝風冒雨生計艱銀鱗網與豪家餐

放鴨

緣陂艇子瓜皮小丫髻兒童蕩春曉呼羣鴨鴨飛拍拍何處
潮聲沙際白放鴨莫放人家田田閒顆粒皆值錢放鴨莫放
沿塘路沿塘新種菱芡蓮晚飯歸來未掩扉鐙下較量鴨瘦
肥明朝持向城中賣賤價也堪償宿債

夜雨集娛園論詩效韋蘇州體二首

夕颺鼓微和蘭氣漾幽宇林梅雪亦消吹香散復聚投分集
裙裾高情謝簪組縱無歌管樂風琴響廊廡何期塵擾餘猶
覲此賓主添鐙水竹閒來話夜堂雨

恆語亦足述咀味苦不長會聯眾心妙寓之於文章謂無迹
可覓發韻何悠揚孰從顯然際元氣窺渺茫譬如幽谷夕微
煦涵中央言近則已遠斯理故難量

打魚聯句

嚴霜三日霽氛埃蕩郊野宵鑿飫百室子九寒儺罷方社新

筠比村熟文瑞冷漚老漁影俯淵作健羨季珪提綱噪眾課

結圍叢艤環眉叔排陣水花鯪腥風夏朝暾勉鉅寒潮騰午

哆勢逕蛟宮翻幼眉深測鯨窟巨萬髻躍絮雲峴卿紛鱗激

羽筇重重又挺交仲淵漸漸纜叢鎖烏鬼掠而西子九蒼蚪

怒於下鳴榔鼓波立

文孺

擲筌雜雪墮競獲轉譁鉤

季珪

盈

載盛璨瑳尾頰力猶豎

眉叔

網脫潛或頗利藪遂釣師

勉鉅

餘蠹攫遊舸租登直抑市

幼眉

釀啟佐宜鮓庭懸戶所珍

峴

卿柳貫杖爭荷脆肉銀刀飛

仲淵

饒涎便腹果坎險閤物力

子九

剝生慘頤朵濫泗罟焚革

文孺

漉陂令繩夏暴殄聖所

哀季珪

詩續杜陵寫

眉叔

于定國銅印歌眉叔學博屬賦

碧紐紅籀一寸明土花蝕角溫不稜駟馬高蓋千秋名漢昭
迄元廷尉平當時制度王霸并峻法未盡祛秦嬴上官霍氏
獄屢興繼皋陶業誰持衡公深經術延耄英韋布不以貴仕
陵食酒一石猶獨醒決疑駁議胸腸清兩廊官燭燦若星公
坐治讞師哀矜慎重大辟逮笞撈具草押尾此印曾湯周之

後世列卿皇天理左吾曷憑公獨仁恕續先聲西平流澤數
葉膺釋之結襪尊王生丙吉違詔憐孤惲得公而三字內甯
鳳皇神爵嘉祥盈國寶豈惟家乘榮私章中有郅治馨龍漢
歷劫護萬靈

雲驤閣

龍首高城蘚磴懸城頭傑閣敞寥天秋郊行旅雙橋月落木
歸雅萬井煙奇石疊屏依粉堞雕闌倒影入澄淵兵塵早洗
年豐屢薄暮江風起管絃

朝斗巖

平林行盡見龍嵒陡絕天梯箭栝叢雨過笙鐘酣谷裏雲深
樓閣瀟空中鄞江上下千流匯挾道西南萬里通更向宵來
把杯酌回看紫氣入秋穹

讀趙忠節公遺集

兵機早歲熟楊忠一角孤城障颶風大帥已聞三戰北狂瀾
猶挽百川東毒流銅馬天胡醉厲作睢陽鬼亦雄兩字易名
綸綍在九原瞑目感臣衷

夏口顏雲壓戟支尊公飲劒答

恩時

兩朝國史書忠孝一氣河山仗護持清到泉心茗雪寫寒來
松意鶴琴知趙家賸有孤兒在忍聽西山採蕨詞

極目新亭景不殊雅歌非復昔投壺人來虎口頭拌擲淚灑
龍髯血已枯京觀鯨鯢封越國荒臺麋鹿走姑蘇西平今日
收淮蔡地下忠魂破涕無

一卷離騷弔屈靈佩蘭三復墨猶馨卽論詩骨超元白不獨

丹心照汗青
季野春秋留賸草

褚鏡湖

飛卿身世悵浮萍

溫次言

招魂儻逐巫陽下
酌酒西風不用筵

來恆方

字亦士號北巖蕭山巖貢著北巖浪者詩艸

陳光類曰君敦行博學放情山水閒涉吟咏有可傳者

積雨書悶

瀟瀟一雨動經旬
寂寂幽居不見春
山靄遙知青染黛
落痕新
長綠成茵風開簾
幙迎歸燕
水漲池塘聽躍鱗
漫說郊原光景好
多應愁絕看花人

錢

璵

號蘇門疎歲貢

呂岳孫序略先生文規入家詩宗陶杜閒涉繪事別有天趣片紙之獲人爭什襲加以岐黃青烏靡不深研博究深厥指歸

採菊有感寄家乾三

採菊不盈把落葉下疏林總有幽閒趣能無遲暮心浮雲感
身世高閣罷登臨經世儒生事嗤余學苦吟

送外兄邢天帆侍父任天柱

嗟余鮮兄弟與子最情親今夕一杯酒明朝萬里人琴聲沉
水外帆影剡谿濱去去吾何贈斯遊莫爲貧

落葉有懷西臺

西風瑟瑟起滄波滿目谿山搖落多一片夕陽蟬已斷幾行
疏影鴈初過悲涼欲絕蘭成賦感慨無端宋玉歌忽憶同人
秋水外白雲紅樹病維摩

夜泊東渡

闊岸月落船尾橫遠波灼灼浮長庚似南似北估客語忽遠
忽近官鼉聲涼氣襲衣薄露下巨魚躍浪寒潮生吾身幸免

遠離別推篷坦腹傾玉饋

秃筆作山水

免折松樹枝休縛清谿箬藉此晞髮交胸中吐邱壑

晨夕與君居吟哦得君助不忍便埋君爲寫埋君處

錢

鎔

字旺熙號可山嵎人郡廩生箸草蟲吟詩集十二卷

縣志鎔天才敏捷頃刻千言詩古文辭蹕厲風發一掃浮靡酒酣縱論古今人物臧否原委畢貫眾以人物志目之喜經濟之學文獻有關於郡邑鄉族者悉撫爲掌故著有嵎志賸言二卷刻詩所見集十六卷文集八卷錢璵家傳略可山學博識卓筆力復道緊峭健故爲詩古文辭如溫太真燃犀獨怪物無遁形其近人者又如秋水之清春雲之靄不名一體

張啟聞序略可山詩時而冲寂閒靜時而蘊藉風流時而堅凝肅穆不可撼搖時而馳驟飛騰不可羈勒

詠史

蛟龍不宅木鸞鳳不棲淵物情各有適安能違其天入海雀

爲蛤踰淮橘化枳變化須臾閒本質安足恃甯作遼東客不
爲曹氏臣龍頭亦名士黨惡非可倫黜茲鄭鄉學豈獨滯其
身

舟過樊江

朔風欺病葉落日送寒潮秋色連天遠波聲動地驕光陰流
水急身世亂蓬飄又向樊江去篷窗倚寂寥

自蒿壩乘舟溯剡谿途中紀事

天晴江水清見底淺處三尺而已矣後者搖櫓前者篙沙石
歷鹿聒人耳自從日出放船行到午不能三十里須臾習習
來北風布帆十幅懸當中船尾袖手坐篙工穩行如駛到青
楓青楓嶺險石腳大石牙觸船船立破狂飆大作天冥冥一
片人聲雜水聲倉皇解衣塞船漏一面喧呼鄰船救前船檣

折船將傾後船舵碎船已橫瞠目直視色如土破篷飛起空中舞雨點如豆亂入艙船上水積一尺強波濤洶洶向人立內水外水相激昂疾雷一聲雨便息雲開日麗風無力水光嫩綠平如鋪天氣蔚藍淨似拭朝暮氣候良不齊一日天淵殊險夷桑田三見變滄海誠哉此語不我欺疾行到處無善跡毋甯鈍拙遭人嗤驚魂初定悟物理爲賦長歌紀剡谿

舟中坐曉

纔辭黃葉岸又過白蘋汀沙響潮初退宵長酒易醒櫓聲催落月人語失殘星去去天將曙名山夾岸青

鐵水牛歌

有序

宋淳熙閒吳越武肅王九世孫朝奉郎諱植自台遷剡攜有此牛或云是吳越宮中舊物或云葬朝奉公

於剡之葉村穿壙時得於土中者

牛郎避債逃銀漢元黃龍戰牛驚竄思逐聖牛西湖旁誤隨
白馬錢塘岸錢塘潮頭狂於雷不睡真龍鐵弩開鐵弩三千
矢不絕牛懾王威化爲鐵渡江泥馬來杭州金牛嶺摧天地
愁九世朝奉小太邱

九世祖有碩德世稱小太邱

遷剡遂得鐵水牛剡中

孫枝紛如雲瓜繇颺衍七百春闊袴大襪無從覓警枕粉盤
亦化塵區區烏金微乎微歷劫呵護煩鬼神牛背微帶土花
綠雙瞳翦水尾拳曲叩角錚錚聲應宮兒童驚呼角能觸昂
頭岫立僵不眠意態似欲奔山谷凡物積久精靈生寶劍化
龍凡化鹿丑日書生桃林士怪怪奇奇駭流俗昔人恐牛變
化不肯留不然胡忍折牛之一足牛平牛平聽我歌爾慎莫
見水踴躍翻身沸海波許遜化形與爾鬪施家大王神劍磨

亦莫予田野隨牧豎朝耕暮耨鞭箠苛庖丁持刀新發礪
攘臂相向將奈何置爾寢室憑寢訛吾祖待爾素不薄忠孝
家稱蘇東坡爾不見銅雀荒蕪瓦作硯留與詞人肆譏訶又
不見洛陽城外相對立荆棘叢中泣銅駝惟爾經宋元明猶
爲人愛惜歷代手澤當比杯棬多子孫百世相撫摩垂之弓
矢兌之戈周家天球赤刀不爾過嗚呼我家一尺五寸鏤金
鐵券猶世守乾隆之閒

御墨淋漓冠諸首爾其尙與此券同不朽

飢鼠齧我牀頭書

飢鼠齧我牀頭書夢覺聲聲裂帛如擊牀驚之不肯走披衣
起坐聲已無敲石取火燭其處一編倒置庭西隅卷面大書
天下墨濃朱淡墨紛模糊首尾破碎難入手雪花零亂几上

同治車庫系金 卷四 四
鋪是時月落天宇黑霜風肅肅吹我裾夜深人靜寒氣逼注
酒自火紅泥爐且翻且飲發長吁飢鼠飢鼠何其愚人生識
字憂患始杜陵野老曾詔吾元代定制人十等乞丐之閒列
以儒汗牛充棟不適用窮年兀兀世所迂卽如某也束髮入
小學埋頭伏几廿載餘書中非無神仙字脈望難成悲蠹魚
光陰荏苒駒過隙自歎雕蟲非丈夫況今大雅久不作鄭聲
亂樂詞荒蕪就中帖括尤陋惡熊劉老死金陳徂茅檐寸晷
更何論萬腔一口成墨猪斯是糟粕宜吐棄豈有英華堪含
咀廩有菽粟園有蔬乾者可飽鮮可茹聽汝果腹不汝咎飢
不擇食何爲乎歌罷復酌盡一壺燈光如豆膏欲枯鼠聲啾
啾招其徒似歎我言良不誣

懊儂歌

妾如畫中身著紙難飛去郎如鏡中貌轉背無尋處

謾語

拐子馬破烏珠哭十二金牌三字獄刺通相術不見用漢高
詭計游雲夢博浪錐鐵已銷圯上傳書書已燒世閒變幻那
可憑金中沸水生堅冰蘭蕙化荆棘平地起峻嶒巨仇如山
可以勿復薄物細故戕及骨肉於乎噫嘻縱有切玉刀安能
剗愁根耳目所及消我魂不如掩卷杜我門頽然盡我手中
樽醉後不知我凡事安足論

書所見

相逢美丈夫手上金跳脫謂是俳優流人言已釋褐髯也隨
其肩攘臂亦燦然老醜尙復尔胡獨怪少年宵人誣李固胡
粉不離手須眉數巾幘可知古亦有

田父

田父耕田識瘠與腴玉人琢玉別瑕與瑜尊朱詆陸宗陸非
朱聖人不作言人人殊

采蓮曲

蓮花結蓮子湖日照碧潯如何同一蒂生出許多心

雞雛謠

雞雛粥粥隨母雞游子出門東復西

剡谿嘆

剡山木日稀剡谿沙日漲木稀土愈浮沙漲舟難上二三十年閒高低隔尋丈晴卽槁低田霖復沒高壤開浚苦難繼旱
涉殊旣往今茲少甯歲日後詎堪想

舟曉

曉來秋色更清華
漸見雲容變斷霞
桐葉墜風飛綠
蜨波光漾日掣金蛇
同舟不謝吹簫客
傍岸先尋賣酒家
此去杭州緣底事
西湖西畔看荷花

自礪城泛舟至郡得詩二十五章

錄

江面忽開疑是月
樹陰攔路半成雲
灘高沙響知潮落
邨近雞鳴覺夜分

尤竟成

字慎之號悔庵別號笨伯臨海諸生著亭集

臨海詩錄悔庵詭激多奇氣高談雄辨四座辟易當大
江南北烽火四起悔庵隱然抱廓清志時觀察段公求
防禦浙東策悔庵走四明條上十餘事公大稱賞擬錄
用以移任去未果仗紉渡江詣軍獻策又不合遂拂衣
東歸周攬形勝猶冀一旦得自效家計漸落老病劇增而豪邁之氣終不少減也

聽標敏上人述少年事詩以紀之

欲訪委羽未得路
老僧指我松深處
暫時拂石坐談心
往事

淒涼勞細訴自言嘉慶紀元始蛟蜃掀波吞島嶼

天子命帥李長庚汝往平之清海宇庚拜稽首敢不欽約束
貌虎東南行我時年少盛意氣操挾弧矢走從征耶孃妻子
遮不住直欲赤手擒鯢鯨王侯將相分內事會看閣上樞真
形同仇敵愾氣踴躍兜鍪冠頂鐵衣著風翻轅纛影飛揚日
耀霓旌光灼爍汪洋溟渤浩無際千艘萬舸帆檣蔽巨礮雷
轟鯤穴空枉矢火飛鸞帆逝壞雲霧天天似鐵怒燄煮海海
水熱白鏑飛空紅灑雪赤刃擁濤碧滾血煙銷日出軍令收
萬里妖氛聲影滅將軍爲國身不惜戰艦合圍竟深入大星
光壓妖星沈部伍散亡存什一死膏魚腹生封侯海天陰雨
聞啾啾歸來屈指幾寒暑妻孥墓上生松楸屋舍傾圮變塵
土蠨蛸熠燿紛滿戶死生離別摧肝腸到此能無涕如雨方

知世局本無定夢幻泡影今始信從茲祝髮空門中靜坐蒲團伴魚磬我聞此言游興刪拂袖不入委羽山將求大覺悟三昧奚事長生丹九還

孫拱宸

字會樞黃巖諸生
著灌書草堂詩鈔

醉雲樓

名花不解語明月不解飲不如無心雲尙是有情品高樓拂晴雲招邀雲中君雲中君不來獨酌愁紛紛一吸百川盡萬事非所云吐氣滿寥廓白雲醉醺醺

映峰樓

匡廬東南五老峰五老峭削金芙蓉蒼溪東南鬱深翠五瓣陡起蓮峰雄蓮峰去天不盈尺天風吹落晴嵐濃一樓豁達當其衝煙雲四面吞無窮夕陽欲素愁不紅舉杯落掌青濛

濛一傾酩酊三百鍾爽氣潑潑生胸中大叫盧敖游太空

余

瀾字梅史瑞安廩生
著味菜根齋詩鈔

湖樓春興

賀監湖邊住杜陵灤上居彎環三面水坐臥一牀書牆矮看
山便簾虛受月疏此中佳趣得勝賞有誰如

野意歸雲外吟懷落酒邊供花瓶注水洗藥鉢分泉細草眠
牛路新晴放鵠天嵒華飄忽易彈指又經年

華蓋山謁雙忠祠

恥隨閩帥豎降旛一死堂堂答九閭遍體瘡痕猶罵賊滿山
風雨爲招魂同時銀鹿徇恩主向晚神鴉噪廟門遺像拜瞻
增感憤飛燐明滅又黃昏

過廢寺

摧頽粉壁落層層香積廚空冷似冰曲廡風酸狐拜月間房
夜黑鬼吹鐙蟲絲絡面憐孤佛藥裹充齋臥病僧欲問琳宮
何代啟碑文磨滅繞枯藤

暮春遣悶

料峭東風三月餘日遲圭影閉門居午窗墨竹翻新譜子夜
青鐙理舊書花事已從愁裏去酒懷不爲病中除多情最是
重來燕猶自銜泥到草廬

歲暮寄張芷泉

冉冉歲云暮年華似水流有詩難抵債無藥可醫愁舉世誰
青眼浮生易白頭遲君來破悶閒話試茶甌

徐

錦

字蘭史嘉興人咸豐戊午解元著靈素堂詩鈔四卷

趙銘序畧蘭史少踐名場卽軼儕偶天才雄邁下筆往往有奇氣砥學勵行文譽傾一時乃身罹寇患幽憤填

磨年未三十方駕
而稅鳴呼餽矣

石村農

出門攜鋤入門攜鋤一年辛苦但輸租天寒餘糧少棲畝有
兒七尺未聘婦西成已了東作新一日不治多荆榛豚蹏喁
喁祝田神赤腳歸去皮爲皴撫脛忽復淚盈眦此是去年杖
痕紫

東家還租罷爛醉無不可西家租未還官吏催如火老農中
夜吞聲訴好米亦復指爲蠹辛苦盼到穫稻天荒廚甑冷炊
無煙今年又復遜前年前年除租得餘米尙有嘸飢婦忍涕

秋思

詩境與花瘦一花添一愁美人隔湘浦雲影幾時秋欲寄相
思字荒荒蘆荻洲清宵長笛起別意滿江樓

送褚二梅榮槐之袁浦

一斗秋風淚憐才兼送行青山長路稿紅豆十年情書劒空
飄泊關河尙戰爭莫思竟投筆珍重數歸程

罄陽道中

山光不宜近刻露愁太洩護以煙樹蒼窈窕態奇絕衰雲堆
鳥外穉日吐林缺客車屢沿轉樵路通屹嶠疏鐘斷易沈遠
村明復滅迴峯儼螺旋下有筑泉冽人面沐晨霏馬蹏蹴冰
裂始知入山深山外固未雪牽蘿懷美人瓊想互縈結聳肩
時一吟唳雁其淒切

陳

銛字子改錢塘人咸豐戊午舉人
官內閣中書著碧蘿菴詩文鈔

庚申之難老母率兒輩避地於會稽之小皋步買舟東
覓得見於橋西草舍慰喜無量感而賦此

白雲迷處所鼓櫂鷗鳬鄉緣溪逢漁子怪問客何方拱手道
姓名委婉訴中腸把袂指林尾水曲橫魚梁門前五垂柳茅
屋隱頽陽中有過江客避兵憩僑裝捨舟盍訪之蹤跡或相
當循途順所適稚子戲中堂乍覩卽奔告母出招由房肅衣
拜老母仰睇鬢已霜喜極不暇語淚眼各盈眶未見思萬端
旣見心若芒兒女俄玆集蚩蚩立兩旁競話賊中事他顧輒
霑裳小婦聞我歸入廚羅酒漿蓬首對食案惟有涕淋浪追
惟長安時聞亂獨徬徨常恐便永訣骨肉遽分張生還幸各
在土銼共鐙光萍梗雖暫泊地僻足潛藏且住亦復佳天倫
趣自長勛哉素患難在莒慎無忘

得方子望農部書卻寄

朝逢桓山禽卻話故人心江關委蔓草憂思一何深貧女惜

園葵幽人坐林樾長嘯激清風扁舟鏡湖月鏡湖蘆花秋飛
雪滿汀洲離鴻叫青冥因之欲遠游落梅吹玉笛春水隴西
頭

九日偕雨辰肯夫芍洲止蓀陶然亭登高

去年今日蠻府作參軍今年今日燕市稱酒人白衣蒼狗倏
變幻天公播弄旋轉如風輪憶昨飲馬長城窟擊麀逐兔麇
兩甄拔劒切肉一何壯方外司馬能令公喜瞋忽念故人官
京洛兜牟擲地非吾倫狂歌直走七千里曉霜駝背冰生鱗
入門大笑冠索絕聊復輒腳開琴尊城南有亭頗幽曠提壺
攝榼娛蕭辰數君半是清華選態度矯若秋空雲西山拄笏
致足樂相視莫逆容天真斯人斯地兩清絕趣舍何殊靜躁
分豈必昨非今遂是各欣所遇良有因謂余不信試諦聽笙

歌別院猶繽紛與吾同爲一餉樂敢道不解文字惟能醉紅裙

拘幽六首

刺促何刺促齒豁頭童兩眉蹙十年兵燹三追逐故鄉他鄉同瓠落迷陽卻曲傷吾足四顧茫茫渺歸宿迴腸百轉籌爛熟泰山鴻毛一邱壑我縱捐軀將安屬嗚呼念我生兮哀復哀白日慘淡向西躋

南山之幽麥秀油油彼君子兮雪滿頭循吏儒林三十秋湘帆九轉不肯收檣傾柁折沈中流羣雌粥粥雛啾啾言顧之心百憂麒麟在藪龍在湫鳩鳥巧佻爲我讐七十老翁何所求嗚呼河湯湯兮公無渡飛霜六月陰風怒

男提女挈而走者誰子萬里曩曩將奚恃母恃兒兮兒若此

垂白又見干戈起戰鼓如雷聾兩耳關河莽莽煙塵裏寢不
甘兮食不旨異域蓬根無定止鮮民之生不如死嗚呼雪霏
霏兮風淒淒林鴉撲簌繞枝嘯

行俵俵視茫茫嶙峋病骨支空牀我無同父雁絕行與君南
北相翱翔君今中道毛羽傷令我顧影神徬徨蕭蕭素髮垂
高堂藐孤婉變三尺強安得神藥箴膏肓嗚呼攬君轡兮君
且駐哀猿叫侶空山暮

噫灼灼桃李三春姿愁煙愁雨過芳時斷紅狼藉流水遲閒
門寂寂空自持游蠶浪蜨不敢窺飄飄但恨風姨癡燕尾捎
花鵲踏枝無言莫遣東皇知迴身照影淚如絲嗚呼生不辰
兮妹莫嗟不見江南之雪塞北花

黃雲漲天黑風吼亂石驚飛大如斗孤城夜半亡關牡野狐

人立家狐走怒髮上指劒在手欲斬不斬遲又久但乞魏尚
雲中守沐猴而冠焉足取董龍爾是何雞狗嗚呼六歌闕兮
陰箒通黍谷爲我迴春風

南歸宿王村

長安居不易匹馬出南圻遠水兼雲度孤禽背日飛江鄉森
戰壘村舍靄林霏向夕暫投轡魂銷游子衣

同人秋祀吳晴舫師於西湖蘇祠

歲晚時艱欲放愁湖光山色舊同儔柳經搖落誰青眼蘆入
荒寒各白頭六代詞章宗屈宋五官賓從悼應劉蘇公祠外
煙波迴那多情移海上舟

李廷獻

原名憲章字芴洲仁和人咸豐戊午舉人官兵部主事著焚餘集

杭郡詩三輯芴洲文采風生才思秀出與兄堯臣明經同登秋榜入試春明從事兵政甲子亂定歸里采訪忠

義人稱
敏練

燕雛篇

烏衣巷口夕陽紅，差池對舞捎春風。
鵲將雛築巢壘，銜泥得意何怱怱。
華堂鎮日珠簾下，香絮樓臺啟芳榭。
杏雨清明黯澹時，梨花寒食惺忪夜。
雕梁深處隱呆思，哺乳光陰費護持。
幾度呢喃遲學語，一番愛惜慰嗔飢。
主人相見曾相識，憔悴春南又秋北。
總爲司分熟往來，更教鬻子傳消息。
吁嗟乎幾個當年王謝家，勞君冷眼覷天涯。
何如養就凌霄翼，會啄長安道上花。

瓢蓉閣表兄招集同人觴詠於伊贊尹衙齋

井梧一葉庭除下，秋士悲秋歎權寡。
故鄉兵燹汨金牛，海角光陰催野馬。
梁園上客遇鄒陽，招我清遊具杯斝。
朋儕不讓

竹林賢簪裾差擬香山社西冷名士老詩翁詞源浩若銀河
瀉旗亭妙詠繼聯翩蓬苑仙才更風雅媿我輪囷一散材
棘何幸並梧櫟去歲流離瀕十死自問已作長平瓦不圖淪
落到天涯朋舊居然重袂把魯酒難消萬斛愁憔悴青衫淚
頻灑

浮生飄泊悲若寄海濱漫作桃源避僦居北郭苦秋隘一塵
絕少寬閒地招涼暫借仙尉衙頓覺囂塵風景異槎枒繞屋
看扶疏蒼翠迎軒寫幽邃雨添柳耳潤蟲書日落苔鬚蟠蚪
字闕境渾忘城市居小園轉觸鄉關思吟朋消夏憶湖濱酒
國詞壇爭拔幟於今回首已滄桑謝墅裴莊遍烽燧何日天
池洗甲兵剖穴薰巢走魑魅相期里社結粉榆秋風不負萼
鱸志

蘋花社集賦秋興分得志藻二字韻

紅羊劫換天胡醉江南灑盡蘭成淚攬鏡新添鬢上霜青衫
海角增顛顚義娥夸父不停鞭一年容易涼秋至寥泚誰憐
宋玉悲激昂空勵張衡志長風萬里送征鴻焚輪吹散青天
字池塘舊夢忒伶俜對之倍觸看雲思碧翁曲令解人愁阻
我風檣一帆利遂使驪駒竟日留清遊幸得附騏驥古來盛
會本難常況復流離兵燹際蘭亭梓澤胡獨傳傳者以人非
以地諸君盡是臺省英努力勳名鐘鼎誌庶幾異日覽斯圖
珍重足媿西園記

哀蟬萬樹催涼早渺渺秋思感懷抱延陵公子敬愛客雅集
城西闢蓬島僊苑迴與塵境殊丹竈琳宮足幽討我聞此邦
春申開繁華不讓邯鄲道巨商大賈爭駢闐歡場競向煙花

好秦箏趙瑟門聲歌牛飲狐蹲雜傭保只知夜氣識金銀那
解世閒有文藻天教我輩敘萍蹤得無欲挽狂瀾倒滿尊清
酒佐雄談讀畫評詩滌塵惱脫畧形骸忘主賓結交合座皆
蒼老頽風頓洗齷齪腔選色徵歌一例掃詩成自覺狂奴狂
海上波濤眞浩浩

黃世善

字上水仁和人咸豐戊午舉人官內閣中書

丁申日上水丈純靜溫和平安橋割王鶴山太僕之
半宅小有樹石繪若谷授經圖鄒仲虎學博爲之記庚
申戒嚴督民團助守武林錢塘門兀立風雨中不少移
如是七晝夜清波門陷猶巷戰於兩敦坊賊爲之卻

乙巳暮春胡書農院長攷定貢院東橋爲茅山河舊址

淤墊已久請于梁中丞重濬之命與高丈芝檢邵君

步梅監工作歌紀事

茅山河貫杭城中開浚議自蘇長公一強三沈顯科第文淵

浩澣河流同南徑保安水門外北抵梅家高橋東水中央有
慶忌宅龍光劒彩騰熊熊百年南渡朝廷小大開德壽重華
宮從此上游遂湮斷中河不與東河通後軍寨建勢稱壯平
糴倉拓年登豐臨流蹋房市舫集其前一環長虹穿花一
棹不知處南湖十里波光融賞心樂事歲復歲滄桑轉瞬何
恩恩宋元以後漸成陸白洋一畝茭蘆叢勝朝拓地試多士
騰蛟起鳳坊崇窿河流屈曲棘闌繞泥深水淺淤萍蓬如學
久困徑茅塞何人爲瞥開其矇安定先生里中望文如蘇海
源難窮建言當道事疏濬瀘清滌濁關文風惟高及邵總其
事善也下走贊水工備具畚揭集徒役百五十日成豐功溝
如衣帶繞白玉波若匳鏡開青銅天香月桂散馥馥雨絲煙
柳搖濛濛高岸剗土使平坦橫塘疊石新磨礮探源溯委事

求是忽得山下泉之蒙螫之蟻之乃成井珍珠萬斛穿玲瓏
文治光昭水利溥能益智慧瘡痍瘳自此出山慎勿濁好敷
惠澤紆臣忠

濬河工竣於東橋河堧棘闌牆外徧栽芙蓉漫成

芙蓉開出好丰姿映水紅留夕照遲悟得文章宜冷豔鷺鷥
橋外立多時

百枝我憶手親栽不逐東風爛漫開及第明年芙蓉鏡裏聯芳
先折桂枝來

周炳元

字伯虎號郁哉錢塘人咸豐戊午副貢

浙江忠義錄炳元好兵家言負奇自喜每酣飲市上仰
天叱咤若重有憂者久之習天文推步中夜與共友李
生范生露立測驗躔度相與喟歎庚申城陷伯虎奉父
母上坐兄弟妻侍以次仰藥死濡筆書壁曰錢塘副
榜貢生周炳元奉父母
階弟及妻一門殉難處

贈袁雪安

矯然一黃鵠奮志臨高飛中道鍛其羽鳴鏑一何悲寒風颯然起白日俄西馳眾口自銷鑠寶刀有昏時慷慨忽長歎長歎當語誰男兒會有合視顏終何爲申椒亮不芳糞壤還自怡怡與故人別臨歧淚暗揮

李大章

字堯臣仁和人咸豐戊午副貢

庚申亂後送邵位西先生從軍祁門

財到殘春冷若秋可堪兵甲未曾收焚餘古木橫窮巷劫後青山賸酒樓世事漫憂強弩末天心終望大刀頭書生自懼同巢幕全仗先生善借籌

曹壽銘

字文孺會稽人咸豐戊午優貢候選知縣著曼志堂稿二卷

馬賡良傳略文孺少孤力學歲科五試五冠曹督學周公玉麒麟稱其文如洪波浴日晶光四射然數奇省試輒

北由教習知縣掣籤得四川將改近病嘔血竟卒性廉
謹謙退喜爲古詩雜文殫思精索其體特工所著駢體
文僅數篇詩

二卷傳於世

蔡以瑞序略文孺少以文名屢經摧挫落無俚益肆
力於詩與諸同人會舉社以授之月鍛季鍊鏗而不舍
顧勿輕示人惟二三知己商榷必

求一字之安而後已其志斯於必傳也

孫德祖跋略德祖與姊夫山陰胡壽頤從先生游最久
同治丁卯二人俸並薦其明年將試春官先生喟然棄
舉業赴吏部謁選同舟逾重洋遇颶風幾殆旣而德祖
等並下第先生分省得四川將改近需次里門歸未數
月遽卒學問經濟未嘗稍見
于世而僅以詩傳深可痛也

東武山

寶林初地接蓬萊於越何年異境開孤嶼煙雲浮海出諸天
風雨挾山來城陰屈曲銜鎧塔樹色清涼護講臺莫問前朝
朱相國斷垣遺碣鎖蒼苔

題文信國集

燕臺羈縲痛經年國事興亡付逝川諸葛功名身後論崖山
風雨夢中天南雲萬里隨朱鳥北雁哀吟和杜鵑龍首黃扉
幾人在獨留碧血照遺編

于定國銅印歌爲眉叔賦

寸銅暈碧傳西京螭文刻鏤于公名王郎藏弄出示此紐龜
上顧蒼鷹驚公之先人起東海獄爭孝婦聲旬劄錄囚平當
嗣門法高車駟馬光朝纓詔書鞫治燕王獄春秋律在甯失
輕爰書一紙酒一石銅章押紙無敲傾自從郡史陟槐嶽鳳
凰五至郊壇鳴緬稽班史鳳仰止今我見此心屏營棱角刊
弊廉不劓比德于玉逾瓊瑩銅花點點泣囚淚芝泥黯淡光
不明炎劉開國尙寬大除苛解燒懲秦嬴茂陵神武密文網
察司乳虎何猙獰殺人攫取印如斗張湯累葉皆公卿累累

若若安足數對此無乃顏汗頰漢京故物見者少長生瓦裂
銅人行高帝六璽並虎紐入關得自降王嬰李唐逮宋尙完
好一朝委棄埋榛荆金章紫綬盡淪剝蟲達一印欺羣盲獨
留此物閱千禩循良或荷蒼穹旌還君此印屬君寶紉以齊
縷盛以簏天文貫索長耿耿詩成起看雲漢清

除夕立春書懷

斗杓東指報春歸鏡裏花簪綠鬢非百歲光陰爭蟻穴殘年
風雪冷牛衣買書有癖貧還諱貸粟無門累轉稀欲賣癡頑
應自笑塵勞未息漢陰機

酒熟屠蘇趁醉眠青氈生計任蕭然一椽且賃梁鴻廬二頃
難求杜曲田蒼狗須臾塵世局紅羊經過亂離年時清報
國惟儒術六幕文昌氣燭天

湯鵬鐵畫歌

平原使筆如使鐵湯鵬使鐵如使筆洪鑪鼓盪造化魂虎頭
膽落邊鸞泣黑金十斛來并州千鎔不範吳王鉤泰伯城中
燭天火山川人物愁雕鏤生氣拂拂十指出以手削鐵鐵爲
屈硬峰生鑄奇雲根老柯百鍊蒼虬骨修廊尺幅龜屏遮生
黃青爪撐衙衙星鐔鱗匣關寒色不數西域芝麻花西番鐵
面有旋
金花螺花芝
麻花金星一去鬼工死壞壁號風捲秋水白晝化作僧繚
龍怒鐵橫飛向江海

寄王菽畦嚴州時攝州守

詔領名州起布春福星東指女牛分桐江風月歸行部竹馬
兒童識使君曾兩守
嚴州七佛烽煙消鷺嶽五符秋色靜雕軍知
公不忘鴻泥迹鏡裏湖山剡面雲

三載蓬萊涖傳車龍門聲價與雲俱永和裙屐風流在正始
文章大雅扶塵路幾人收椽竹不才祇分老菰蘆離懷重觸
知音感會寫黃金市駿圖

明宣宗敕徵蟋蟀歌

有序

敕云敕奉御劉安兒知府莫愚況鍾等今年閏八月
節候稍遲爾等再取一千箇兩運送京劉安兒在後
運來故敕宣德八年八月初二日又敕云敕蘇州知
府況鍾比者令內官安兒吉祥取促織今他所進數
雖多皆細小不堪的已敕他末運要一千箇敕至爾
可用心協同他幹辦不要誤了故敕宣德九年八月
初六日

見王維夏偶筆莫愚常州知府也

木棉庵裏八哥死半閒堂角乾苔紫四百年來蟋蟀經不屬

相公屬天子戴金髥漆宣德益果廠珍賞無與倫玉階碧草
動秋色詔書急遞飛將軍貂璫疾走江南道城狐社鼠磨牙
爪三吳民力苦徵求居人餓死中人飽蘇州太守民曰賢三
校閭布爭吳縣帝闈上叫不得路郡衙拜敕心淒然花萼密
置金籠罩運綱入遞催征調一騎秋風促織來宮娃動色天
顏笑我聞英武之略推宣宗馬林大閱伏飛雄松潘藤峽受
降虜螭螭絕塞銘邊功詔罷西番市馬匹朝廷務與民休息
天寶開元指顧閒捕蝗詩後秋蟲敕爾時軍國誰平章戢戢
相業稱三楊惜哉宋濂不可作幽風無復圖明堂吁嗟乎秦
關蜀道走劇賊戰場碧血蟲沙劫鹿酒夜酌龍種腥淒淒芳
草王孫泣蝦蟇天子可憐蟲南渡江山蝸角中君不見鳳陽
督師蟋蟀相一代葫蘆畫依樣

題河東君小像

誰將螺黛寫嘖妝拂水清漪照額黃
莫問當時紅豆曲夕陽
衰草耦耕堂

六代鶯花總劫塵滄桑遺事屬傳聞
美人不欠尙書死一角
殘山弔絳雲

象皮鼓歌

有序

象皮鼓者姚公

啟聖

征臺灣時戰鼓也藏於其家同

社孫子九曾見之眉叔賦詩余亦繼作

乾陀之產麒麟毛剝皮輓鼓雷怒號歲久蝕爛氣不臊
靈響夜發蚩尤逃誰其遺者尙書姚會稽覆黼雄宮
髡異人崛起高皇朝毀家敵愾鶚軍招紫琅賊壘兵
氛消擢藩閭嶠馳星輶爾時毒霧東南交耿藩鄭逆
蟠羣妖十疏上聞

天語廢

命公督師麾節旄蜈蚣龍虎二山名交戰塵一鼓作氣風刁刁

樓船駛飛輕於毫廈門水立天吳驕鐵衣濺血蠻頭梟再接

再厲援枹勞白雨急點隨腥颿旬旬隱鱗山岳搖刀光燭天

天爲高劉林鄭逆駭竄如哀狻鹿耳險塞窮其巢偃旗罷戰

鳴金繞執馘釁鼓號啾嘈捷書夜奏馳

神霄春官增秩

殊恩叨七閩十稔煩戎韜

皇畿萬里恢崇朝滅難加女符銘謠書勛

太廟功不祧嗚呼方今海甸愁繹騷林邑象貢虛方艚時無

如公隻手奠靈鼇坐令此物埋蓬蒿雨淋日炙兵火燎哀吼

遠答胥江濤鼓乎鼓乎爲爾傷所遭

汪緘三同年

世金

之官奉天寄贈一律

羨君此去覓封侯捧檄鳴鞘指錦州黑水河源流王氣白山

城郭入邊愁西風驚樹樽前淚

乙丑吾越大水君致書屢以先塋爲念

落日胡

笳笛裏秋知否青衫憔悴客華顛仍踏省門遊

余將有日下之行

題幼眉鷗水草堂詩卽用留別

我初讀君詩與君未識面謂是古人作舌咋目先眩昔昔思
見之末由覲清盼邂逅忽相遇愕眙疑夢幻貌疏神逾親象
忘意無閒西陵樹若薺鏡湖水如颶東西遙相望伯勞與飛
燕會余來東皋假館比羣彥風騷嗣前軌東中盛壇坫君尤
橫無敵跳盪恣白戰赤手搏脩蛇耿天倚長劍意行無危途
遁狀懾物變老榦芟繁條古藻謝今豔俗儒喜緣飾往往肆
譏訕介然一是爭卓爾千春券與余獨神契兩載結歡悌詩

論窮毫芒危言苦鍼砭學殖愧荒落蕪穢資鋤鏟玉攻纖
瑕鍛金礪微欠道義古所敦方茲信不忝所冀無乖離昕夕
共樽讌苒苒驚流光二曜迅飛電攬鏡搔短鬢髮容羨童叟
壯志非疇曩頰首事薄宦別袖發耶谿征車指畿甸出門愁
惘惘風雪凍兩肝飛沙欺天光層冰滑磴棧落日羸馬嘶荒
驛敝裘綻豈不樂朋簪驅馳坐貧賤何當脫塵縛聯襪遂初
願掩卷一長嗟遙天唳征雁

長歌別同社諸子

男兒三十須通侯三公王儉猶黑頭車中乃可無七尺車前
豈可乏八騶誤人最是毛錐子坐令鬱鬱久居此行年四十
未成名鄧禹睨人笑不止昔年乳虎文中豪衙官屈宋奴命
騷對酒起舞拓金戟意氣往往陵其曹爾來百事居人下破

兩浙輶軒續錄

卷四十四

讀書錄

卷四十四

庚

8x8

帽籠頭遭鬼罵五陵同學幾鳴珂
羣雄赫蹏手摩十萬紙墨痕亂灑林
社東皋東彈碁格五呼羣雄赫蹏手
花紅花落花開自昕夕那識人生有
離別前年莘老子客蠻
中瘴雨桄榔聽鴉鳩蔡侯季行逐計
吏車孫郎峴會獻金門
書余亦飢驅留不得風笛一聲愁日
色長安二月春風寒河
冰百丈排羣山馬首雪花大如席
蕭蕭客底衣裳單丈夫結
髮志書策一朝頰首事末秩元龍湖
海氣不豪次公意態狂
非昔仰天擊缶歌嗚嗚我才豈合淪
菰蘆百里雖局非泥塗
仕宦何必執金吾牽跼牖下胡爲乎
酒酣一吐平生語明日
雲帆滄海去

駱乘輿

字澹園浦江歲貢著澹園詩鈔

張淑序略澹園坦夷率直雖窮愁抑鬱不少改其和易
溫良之素其詩如元酒太羹布帛菽粟淡遠疏古明白

簡易老
姬都解

三月聞蚊

自從兩載困兵戈寂寂門闌雀可羅太息黍民來太早人閒
膏血苦無多

詹大開

字成九
開化人

家傳略大開學有根柢生平言笑不苟父早
世事母以孝聞辛酉歲遇賊於城東死之

早梅

依稀籬角兩三枝風雪叢中自護持絕代佳人悵塵世瑤臺
有約莫歸遲

詹大恕

字心如開化人著
綠雲小舍詩集

家傳略大恕熟於史事性喜吟咏生平潔清自好不事
干謁歲輒集貲振饑修尊經閣添購書籍庚申歲約徐
國樑等糾眾擊賊不克死之

綠雲小舍題壁

依依綠影入華池
獨坐簾陰有所思
草倘不鋤終礙路
花如自好肯依籬
偶拈方絮新題字
故罷瑤琴且學棋
長守舊邱謝功業
封侯無骨漫相嗤

曾

諧字小石永嘉諸

孫錫鳴序略小石家松臺山下有林亭池沼之勝所謂
怡蜀也余每詣郡相與賞花觀魚爲樂小石嗜飲好爲
小詩麗雅可誦所藏弄古金石法書名畫文籍頗富尤
善觀書率夜踰而不臥乃以鄰郡寇警挈家浮海詩愈
工而境愈窮歸不三四

年齋志以歿可慨已
甌海詩話余爲曾小石編校遺詩付刻佳句如閒游云
竹疎先得月松小未成濤偶占云魚移萍葉去鳥負落
花來園林云近水人家插楊柳分秧時節叫蝦蟆晨起
云瘦藤纏怪石碎葉響空階秋懷云窗窗前葉少時邀月
山外樓高合時雲雨窗排悶云畫簾捲處初迎燕池水
平時好放鷺春興云水痕沿曲岸山色戀斜陽舟行云
郊園多種橘村女喜簪花消夏云荷葉爲杯差解暑林
檣入市已嘗新卽景云尙多結習難除酒安得餘閒學

種瓜曉起云鳥叫將殘月蚊喧欲曙天倚枕云長日無
書消不得舊游如夢記偏難盡欄云食葉蟲聲多似雨
穿簾燕子熟于
人皆清婉可誦

吟詩

斜月度紅闌秋風冷素簷吟詩久未成踏碎階前葉

隨意

隨意掩柴扉因時可息機山清知霧散風急帶煙飛晝靜鳥
俱寂春寒花尙稀愛他一夜雨綠上釣魚磯

雨後

秋在芭蕉上涼生枕簟閒蟲聲繁似雨樹影黑疑山夜盡鐙
先施蚊稀扇亦閒安身惟睡好及早掩松關

秋夜

階前蟋蟀鳴秋夜靜且清何以寫我意菊花香滿庭長歌旣

已盡侑以雙玉瓶醉臥天地閒坦然遂忘形
歡樂日苦少憂愁日苦多壯士拂劍起美人對酒歌勸我速
行樂壯歲休蹉跎不見英雄士一一歸山阿

夜泊石門

四野青濛濛夕陽影西沒須臾銀蟾生流光吐山缺人靜境
更幽萬籟聲早絕松高微墮影石奇瘦露骨皚皚灘上沙西
風捲如雪船頭夜吹簫流音何清越坐久不忍寐微聞木葉
脫翹首懷故人白雲在天末

春夜

夜靜天無雲清氣襲人骨露華漸以滋洗出松閒月宿鳥鳴
高枝藤花墮微雪念我素心人彈琴候林樾

晚眺

寒煙上林薄一徑入敲斜深竹暮聞鳥老梅春有花殘年催
雨雪孤癘近煙霞欲問尋詩處橋頭賣酒家

夏日園中偶占

蜻蜓隨意立漁竿幾度忘機靜裏看明月在天風在水藕花
扶影上闌干

水檻雲廊屈曲通柳邊疏雨竹邊風惜花蝴蝶狂如故日日
尋香上刺桐

登隆山作

鳥道勢盤空紆迤入梵宮低懸海門日高語塔鈴風佛地黃
金滿時菜花盛開故云人家白板通青雲無限感落落興誰同

端陽坐雨感賦

榴花又向鬢邊紅草草光陰類轉蓬落拓吟心紈扇底寂寥

人事酒杯中海氛未靖猶聲鼓節物無聊況雨風翦得菖蒲
綠如許斬愁祇恐劒無功

暫得閒身作睡王北窗也自夢羲皇雨蟬齧枕涼如水風葉
攪書綠滿牀貰酒安排今日醉看花振觸少年狂煙波十里
南塘路爲有扁舟興不忘

舊遊如夢可重來春去簾櫳亦懶開桃葉誰家雙姊妹芙蓉
隔水幾樓臺因風飄蕩萍無主與月團圓扇未裁莫管相思
人易老拋殘紅豆滿蒼苔

買得千條續命絲湘纍哀怨有微詞黃墟感舊人何在綠髮
緣愁鏡已知畫舫銀燈前度夢空堂夜雨十年期梅花落後
多惆悵一笛江城忍更吹

丁巳看梅

微雨響篷背嚴寒似欲雪天意故放晴青峭露山骨健步偕
嘯侶泥深徑欲沒人家脩竹閒一枝已清絕遊棹惜來遲開
落何飄忽在樹無多花虬枝自突兀石瀨鳴淙淙琴筑寫清
越古磴藉深苔寒潭劃半月欲攜玉笛吹香魂愁唐突如是
游亦佳歸與逋老說

約林小
竹不至

舟夜偶占

帆腳著水青濛濛鐵精夜喚蒼龍宮

是夜適聞笛

山橫浦口江春

黑月落海門魚眼紅神女靈旂捲煙霧成連絃索鳴天風鄉
心一夜輾轡轉曉看旭日扶桑東

自鎮海泛舟至乍浦作

順風四百里一鳥倏經過到岸青山少落帆新月多浪花圓
滾雪雲葉細鋪羅家國愁無奈書生亦枕戈

初至西泠登湖樓作

舍舟如脫械客魂驚初定言登湖上樓豁然謝視聽初日媚
遠峰一榻覽羣勝菱荷旣枯折碧捲波光淨宿翠墮空林隱
隱聞禪磬

秋曉湖上獨步

曉寒人跡稀露華尙盈草波光凝不流羣峰影悄悄隄柳餘
枯枝秋風吹易老遠寺隔湖煙鐘聲出林杪

秋宮怨

秋深輦路長莓苔繡戶無人一扇開不道夜深風露下流螢
還過苑牆來

殿閣西風作意涼御衣裁罷日猶長宮槐飛盡歸鴉影自倚
簾櫳看夕陽

鴛瓦霜寒夜未消
窗前燭淚滴紅綃
秋衾壓夢寒先覺
隨例恩恩又早朝

過白蓮塘作

老樹蕭疏咽暮蟬
西郊無復舊人煙
風清月曉橫塘路
秋夢依稀墮白蓮

自龍湫寺越嶺觀飛來羅漢始用竹杖作

山徑如脩蛇一綫
僅容足輕身鬪猿
獒所恃惟龍竹下
嶺頗平夷畦菜搖
寒綠一徑入脩篁
風泉雜琴筑懸巖
墜我前神斤剗其
腹未登羅漢堂眞
相已在目有翅胡
不飛委身在空谷
歛問去住因山花
笑破萼

夏至後四日至滌上作

蘿磴晝陰陰山深寺亦深
雪翻雨後瀑蟬語風中琴
隱吏已

仙去藤花開滿林日長坐忘返空翠溼衣襟

七夕前一日立秋風雨感賦

蕭蕭梧葉也知愁橫笛何人獨倚樓一雨送涼先到枕半生
多恨況逢秋嵇康入世無仙骨潘岳閒居易白頭望斷紅牆
天上影年年靈匹怨牽牛

大暑行

紅鏡炎炎東方高雲師雨師紛遁逃天公乃學酷吏酷陰陽
爐炭相煎熬百物盡遭鍛鍊苦金石流爍枯脂膏癡龍渴睡
大海底雷鞭不起天更驕插足便覺火坑滿揮汗已作珍珠
跳出門誰家襦襖子翩翩羽扇當空搖是時赤地方千里田
夫蹙頞憂良苗車輪踏翻銀河水人力安能回枯焦夜闌更
上南樓望眾星燦燦光騰霄炎官張繖赫以怒愁眉坐對終

無聊有風且展嵇生簞有酒且醉鄭公醪因思寒暑本一理
天地亦自爲長消成功者退當令貴四時玉燭相和調造化
未應惜雨露炎涼之權誰爲操吁嗟乎炎涼之權誰爲操君
不見泰山之雲起崇朝

題吳季子挂劍圖

三尺劍一抔土躑躅摩挲泣風雨三尺劍一寸心肝膽然諾
重千金千金解贈如脫屣龍劍照徹土花紫秋墳月黑唱新
鬼吳兒木石真知己末俗人情薄如紙翻雲覆雨靡所底九
賓庭給連城璧壯士擊柱髮怒指食言不恤言在耳南面之
尊尙如此縞素漠漠風霜起交情白日如秋水死生不變曾
有幾吁嗟乎死生不變曾有幾君不見吳季子

林大椿

字恆軒號蕺
士樂清歲貢

孫衣言序畧予年十八九在邑校從曹先生秋槎學古文辭其時樂清林君恆軒亦來從學恆軒年少長貌寢而氣樸見人輒開默無言在邑中尤不輕與人交予亦不時相見後至樂清訪之見所爲詩予甚喜其五言古詩質實有義理以爲可傳又十餘年予自京師歸復見之於郡城出示其詩益進恆軒善事父母居鄉恂恂篤謹常終歲閉門教授不輕出喜讀書著文於諸儒書及天官厯算家言皆能研精覃思而書皆未成獨其詩可

以示

世朱壽保曰大椿別有垂涕集三卷多道咸豐辛酉壬戌閒事其中感激時艱闡揚忠節雖詞多質直亦足以備一邑詩史

與履舟論等韻

切韻古所無直音兼轉注神珙反紐圖奧義玉篇附西域二合書震旦久傳布兩字出一音得音合天趣字務同母求音循本等赴上切下爲韻不憂毫髮誤字母三十二包羅文萬數脣牙齒舌喉啟口五音具半商兼半徵清濁微芒度緯之

四聲譜平仄從其故方寸縱橫調重輕聲參互或以開口呼或以閤口吐類隔閒音和居然天籟寓異哉波羅門此理伊誰悟抑聞古人言妙旨生初賦高氏與叔然久已入牋注梵學導其流儒家循其素空谷可傳音道存無字句

籠鶴行

瑤池水乾瓊蕊枯仙禽下與凡鳥俱清聲藻質不自愛鵲不成鵲鳥不鳥紫府真人碧山逸客期爾來遊風清月白何天不可以高飛坐使樊籠羈六翮吁嗟乎律呂爲音玉爲翰終日供人耳目玩喳喳唧唧在爾旁鳳凰有心爲爾惋

鳴鵲行

鵲乎爾何來乃在河之干一鳴嚇紫鳳再鳴訕青鸞旣無錦雞孔雀之文章又無飛鴻舞鶴之羽翰徒鼓如簧聲朝聒而

暮謹聽之令人心不歡靈禽瑞鳥走相避惡聲往往生陰寒
豈無明珠彈飛肉區區苦吻何足辱東風吹萬舒春陽會須
結舌草閒伏

野田雀

野田雀款款飛來啄田中粟一飽忘危機農家膏與血止以
供爾肥丹山有鳥名鳳凰不見竹實甘忍飢吁嗟乎雀何多
兮鳳何稀

書意示諸生

治璞可爲玉鎔鑛可爲金人苟不知學抱質安足欽鍛石不
成劒磨杵不成鍼人苟無本質徒勞鎔鑄心

錢塘懷古

文林千樹墨花香漢晉風流各擅場講席春秋飛紙翰吟壇

南北會衣裳唐詩後勁羅昭諫宋學支流趙善湘珍重百家
書藏在精藍終古護幽光

規模草創小朝廷半壁山河亦帝京後日哀詞朱鳥怨當時
宿將白鷗盟風波血海元戎死玉帛冰天宰相榮留與千秋
作憑弔夢華遺錄最傷情

書邑志後

雁蕩蓄靈奇丹霞孕清淑人才應運生赫赫照耳目名儒王
龜齡大賢亦推服名臣章大經後世猶尸祝其次爲名士文
章寄簡牘元有李玉峰明有侯二谷詞壇傳其書交口稱老
宿緬懷鄉先生芝蘭有餘馥當其窮居時業已不朽卜彼亦
七尺驅天豈生使獨千秋志士懷古風何難復誰云地不靈
自是書未讀盛衰理可推吾嘗思之熟

讀史記

文運衰頽四百年
鉛刀筆總紛然
自從秦火燬書後
第一尊經是史遷

飄零讒謗交攻日
開闢文章未有天
一卷離騷足千古
詩亡重見變風傳

卮言日出盡秕糠
拉雜摧燒賴始皇
自是典謨終不朽
卻從孔壁奏笙簧

安排萬世治愚盲
文物衣冠盡一坑
亭長君王刀筆相
英雄原不屬書生

鄉勇來

官兵來官兵來
郡城方告急
官兵隨時守禦
安能來解一官兵
不來鄉勇來
雕青惡少稱將材
偵知寇退無疑猜
從以數百

無賴于虎符在手歡如雷乘危來攫民間財

解二

鄉勇來時三

三五五既無主將又無隊伍已燒孫家屋又來鄭家槌大鼓

有狂生怒如虎急招健兒勇可賈手縛勇首如縛殺爾來

斟斟爾亦賊項下一揮血殷斧

解三

勇首誰楊成祿少年游手

生計蹙不顧雙親但馳逐走叩鈴轅規克復覬望軍功兼積

蓄翻以禍心受民戮功罪之間須表暴

解四

謂楊無功焉得謂

無功虛聲吶喝入賊中官兵累萬將來東賊聞此語心忡忡

棄城宵遁如飛風迫賊速去乃其功

解五

謂楊無罪楊罪自在

爾來賊已去何不入城謁官宰招搖攘奪欲壑如海

解六

楊罪

固可誅狂生亦已愚姑遼緩之繫其軀獻之大府訴剝膚權

衡功罪當不誣

解七

嗚呼噫嘻古人設兵以衛民召募鄉勇是

亦兵不能殺賊而乃荼毒我生靈君不見明朝黔兵激民變

外廷聚訟相詬爭官兵尙如此何況鄉勇多匹命尺籍半非
眞姓名寄語主兵者召募慎勿輕但觀楊成祿前車之覆何
分明

入解

弔殉節諸婦女

青蓮雖憔悴不受泥滓濡幽蘭雖枯萎不爲糞土汙芳閨有
本性無愧烈丈夫守身如執玉顛沛志勿渝陰霾蔽白日城
社號妖狐矯矯良家女毅然捐其軀或隨奔湍去泛泛如鷗
鳬或以投繯罄林木驚鷲鳥或顛層崖閒玉骨碎須臾或觸
巨石下頭裂血模糊或起奪賊刃自剄無踟躕或申申詈賊
烈炬甘焦枯凡此抗節死死不必一途貞魂游碧落正氣達
元都星娥肅然起玉女走相扶姓名通帝座百靈動色呼聲
光振雷電下照海一隅

聖朝重節義天人有合符閨賢豈終晦獎善理不誣作詩誌
景慕用備彤史須

楊

詩

字範園平陽增生
著諫果窗吟草

鮑臺序略范園少孤廢學賴慈母之教得以有成詩深
入顯出如白香山作老姬能解非塗飾於外者可幾也
吳承志曰君嘗著國海遺珠一書補正
府縣志乘之闕失網羅舊籍用力甚勤

富陽夜泊

篷窗收暮雨剛是晚涼天月色少焉上羣鷗相對眠孤鏡迷
極浦疏磬散蒼煙中夜不成寐思鄉意渺然

客館聞孤鴈

雲水蒼茫處羈人夢未成以余方獨坐閱爾尚孤鳴月色半
窗淡鄉心一夜生北堂今健在遙憶不勝情

江樓秋望

蕭蕭風日冷木落萬山秋鳥下斜陽渡人依近水樓潮聲吞
遠樹雲影亂歸舟獨有登臨客蒼然起暮愁

喜晴

隔林乍聽鶉鳩嘯最喜初收雨一犁信手鉤簾春晝永野花
紅過小橋西

趙福雲

字耦村山陰人著
三借齋詩集二卷

陶潛宣曰君幼好學異常見既冠隨父官闕輔又就學
京邑禮讓善病性復孤落時方多難烽火滿地猶復力
廣研討屹屹忘倦心神彫悴益以疲藹卒年三十六詩
骨重氣蒼意所律細索中燕囊各集詞益悽惋人謂得
江山之助尤工填詞有小石帚
生詞二卷通編爲趙處士集

太湖

三萬六千頃客愁飛滿湖長空一片月送我入姑蘇仙樂渺
何處白雲無盡途輸他鷗鷺伴清夢繞菰蒲

入終南山

飛鳥不能度盤空一騎來峰頭撐積雪石腹走驚雷呼吸諸
天應功名捷徑開終南山萬仞擲筆待仙才

度秦嶺宿鱸子石題壁

積雪茫茫白來登第一山星辰忽天上風雨自人閒老樹龍
蛇勁荒林虎豹頑昌黎祠宇古絕頂費躋攀

韓文公所陟秦嶺在藍田縣此

地名阿土人亦立廟焉

仙姑廟

畫眉嘯春山木香嬾雲窈窕扶紅牆妝樓一角夕陽冷寶鏡
搖魂墮蟾影雙蛾掃綠參差光苔痕繡蝕輕羅裳銀波溼地
花枝舞珠淚橫斜纖秋雨刺天石骨青嶙峋螺旋蟻折愁行
人芙蓉擘碎斷厓裂倒捲銀河千尺雪靈風颯颯迴蜺旌夜

半月落金雞鳴

小孤山

涼風江上來吹動一枝勝榜人解纜行鏜鏜伐銅鼓薄醉倚
船牀夢醒日亭午蒼煙散孤嶼樓臺近可觀金碧耀玲瓏波
濤互吞吐山花豔絕壁參差逗秋雨窈窕神靈姿脈脈含情
苦願言涉清流褰裳采芳杜

中秋夜登黃鶴樓

昔人此地乘黃鶴萬古茫茫賸一樓顧我獨登明月夜有誰
高詠大江秋洲邊芳草傷青鬢笛裏梅花欲白頭笑倚危闌
望鄉國歸心直挾水東流

送張夢錫孝廉

大柝

入都

手摘三峯月長歌游

帝京冰霜磨俠骨風雨折離聲白鶴雙飛影時與令叔同行青琴萬里情文章能報

國努力頌昇平

武功

楊柳綠無縫長條不可攀東風歸客路細雨武功山春思逢花發離愁帶草刪紅塵三萬點吹送馬蹏還

函谷關

當年老子騎牛地不見關門紫氣來雞口寒催殘月落馬蹏危蹠亂峯開千秋割據爭天險六國輸贏絀霸才可惜長城還自壞興亡徒使後人哀

夢錫庶常至自淮南于風雪中見過銜杯話舊賦此以

贈

朔吹滿天地開門逢汝來古心抱冰雪奇骨出塵埃離別三年話飛揚一世才憂時同看劍所地慣悲哀

隆安行弔高筠坡大令

并序

君諱延祉蕭山人長身伉爽智畧絕人辛亥春攝隆安縣篆時粵西方用兵隆安地當賊衝君下車設團練備器械爲除賊計先是賊首那利中陸鵬理凌亞東一股經左江兵痛勦竄入山君設謀誘陸鵬理殺之擒賊目蔡亞合等數十人獲那利中孥口毀其祖墳賊懼且怒會方伯勞公督兵勦感圩賊飛檄趣君會勦遂馳至歸德州率土司黃爲錦往援九月初八日抵白山深入賊巢遇伏同時被害當君之赴粵也以十六歲子隨行人曰攜此弱累奚爲慨然曰異時

馬革裹屍冀若收吾骨也然君屍卒不可得兵興以來守土官聞賊至率逡巡避君以書生攝吏事未朞月卽能殺賊能激勵蠻司慷慨就義壯已君與弟延祐同舉庚子京兆試乙巳冬余游都下得交君昆弟握手論事無不切中時弊心知爲非常人今秋再至京師君已奉檄西去不數月凶問突至傷感不已詩以弔之

昔年走馬黃金臺縱橫杯酒多雄才高侯壯氣一千丈峨峨直決層雲開別來再上長安道赫赫奇功傳嶺表髑髏怒擲高於山戰血淋漓灑秋草書生辦賊元戎驚獨當一面隆安城飛書走調急如火蠻叢慷慨招義兵落日沈沈吹簞策大旗獵獵悲風急羣賊方探赤白丸孤軍乃值蒼黃食橫刀躍

馬馳入陣結纓嚼舌血花咽石甌雄威八荒震大呼殺賊爭
先奮爪牙忽摧氣逾憤鼓聲死臣力竭賊眾如麻殺不絕馬
蹶一蹶賊刃接怒髮連蜷目皆裂英靈夜夜繞賊壘櫛其魂
魄聚釜底

王師繫之如繫豕臣屍不還臣瞑矣嗚呼葛公

提督壯節公楊公

上海典史慶恩殉海疆
忠祠廟遙相望越山矯矯雙鳳凰與公鼎
立扶綱常故人痛哭多慨慷悲歌招魂天一方魂兮不來蒼
梧蒼

出都示別

并序錄四

自辛亥夏入都兩值秋試皆以寄籍故礙不得與家
大人汧陽書至命俶歸裝涼秋已深離思忽積脂車
言邁惻愴踟躕故人挈榼提壺出餞國門之外浮雲

千里落葉萬山人非木石何能忘情罷酒獨吟得詩
八首傷懷感事情見乎詞青天廓然黃鵠舉矣阻我
者安知非玉我於成乎

滿地秋聲忽倚闌十年塵夢醒邯鄲門前種樹三眠老鏡裏
看花一笑難豈有文章憐李賀更無姓字識方干青琴別奏
歸風操肯向人間續續彈

蕭寺前游感祖庭閉門重對佛燈青

嘉慶癸酉先大父應京兆試僦居準提禪院卽

余今日廿年仕宦家纔破

大父率武進時以官累被議家遂籍沒一硯摩挲石

有靈

大父有硯一久失去復得諸長安市

廉吏兒孫甘澹泊異鄉蹤蹟苦飄零

臨風欲寫招魂賦幾杵霜鐘不可聽

別後茫茫付酒杯國門回首隔蓬萊
燈前風雨聞雞起道上冰霜策馬來
秋信寒催楓葉落歸期遲過菊花開
梁園未許

枚生住枉費當年作賦才

迢遞秦關百二重歸心飛度碧芙蓉恨無羽翼追黃鵠願向
神仙借白龍大漠風聲當夜勁太行山色入秋濃天涯畫徧
旗亭壁惱殺琵琶唱懊儂

懷慶太守行

并序

自西賊入豫州境破歸德圍開封所至殘毀繼由東
南竄渡河陷溫縣距懷慶郡才四十里民大恐郡守
余公炳燾集士民議戰守時河北鎮守兵僅疲弱三
百人公以羽書白大府請兵無應者求援鄰省惟山
西許以五百人卒亦不至倉庫久耗匱不足支十日
糧乃亟出私錢置守城具立平糶局民恃以安部署
甫定賊大至蓋六月初三日也公督僚屬分禦四城

發矢石斃數十人殲其最悍賊目一賊爲少卻相持
五六日攻益急地雷轟擊外垣猝毀竭力堵塞得無
恙適山東救至稍挫其鋒賊乘夜築木城三外掘深
溝密排竹簽其下掘我軍內外不得合公夜縋壯士
燒賊營復毒其汲道賊多斃攻稍緩而北路大軍繼
至駐十里外擊賊聞有斬獲終爲木城所阻又隔沁
丹兩河聲問不能通公晝夜戒備躬按視士卒飲食
居處與同甘苦踰月居民糧漸盡疫大起身自拊循
散米粟致醫藥待之以恩堅守六十餘日民不忍舍
去七月二十八日躬率兵下城焚其營餘賊潰散生
擒百數盡獲其輜糧與大兵會圍始解先以嬰城功
晉監司尋加按察使銜及圍解大帥上其事將膺異

擢公曰守城知府職也吾不敢貪天之功邀非分榮
當時愈賢之自公守懷慶城而大河南北皆有備賊
由是不敢犯遂竄山西嗚呼會匪起自粵西所破郡
縣不可數計公獨以區區一城當其鋒垂七十日不
拔可不謂賢與公籍浙江山陰以舉人起家爲陝西
渭南令捕盜有功洊擢今職林文忠撫秦時偁關中
賢令四公其一焉公與先汧陽君同官最契余嘗識
公之爲人今春過懷慶聞父老談治行甚悉後聞懷
慶被圍關中人皆以爲憂而余知公之必能辦賊也
未幾閱公致所親書備敘守城狀因述其書中語爲
作詩以美之

賊船夜渡黃河北鐵騎全屯柳林側紛紛直薄覃懷城城中

祇餘三百兵太守椎牛泣享士誓與孤城共生死狂呼撼城
城欲摧彎弓殪賊殲其魁長圍四合壓雲聳高壘深溝屹不
動縋人夜出腥風號連營一炬光干霄百道交攻勢彌急礮
石雷轟箭星集援兵報道南北來城中鼓舞聲喧阗那知畏
賊縮如鼠丹河沁河賊橫阻六十餘日糧斷矣振臂一呼瘡
痍起守陴慷慨聲淚并忠誠貫天天爲驚欖槍夜指妖雲破
賊膽潛吞賊鋒挫逡巡欲逃不得逃揮兵截擊驚魂搖慘霧
沈沈倏開盪赤日排空甲光颺萬人遮拜歡如雷太守活我
恩崔嵬嗚呼軍興以來數百戰封疆孰敢當一面太守力障
危城完孤忠報

國何艱難吾願太守養全力指顧中原掃餘賊

夏日雨後

庭樹滴殘響披衣坐晚涼雄風迴颿雨時雨飛電雌霓畫頽陽石

挾水流急天開雲走忙湖頭萬荷葉葉葉蓋鴛鴦

陶在均

字舟愚號蒙泉會稽人江蘇候補縣丞著蒙泉集

舟暮

微涼逗孤舟蘋末風相逐暝色帶青林斜陽背黃犢湖氣聚成煙數峯煙外綠

感事

麒麟高閣畫英豪健卒爭披蜀錦袍率土窮黎存有骨弄池羣盜密於毛一丁不識皆奇士百事無能只我曹大戟長槍行路滿袖中漫詡筆如刀

陸秉鑑

字蓉楣蕭山人著學鑑遺草二卷

陶潛宣曰君自幼穎悟絕人七齡即能詩未成童十三經俱成誦年二十餘卒君家世多壽考簡菴與王照老

人並壽八十餘而君與兄秉銓
皆美才短折未竟其業惜哉

月夜和小岩作

西風瑟瑟夜漫漫雲雁孤飛照影單
明月一庭人獨坐滿身花影不知寒

鄭雲林

字月巢餘姚歲貢著游燕詩鈔

陶潛宣曰君詩長于學杜上追漢魏時值咸同之間烽火滿地轉徙囊筆遠客幽燕館永清最久流寓瑣尾感事嫉時本小雅怨誹之音成杜陵傷時之作詞多悲壯節更淒涼而蘊藉宏深不失諷諭本旨亦足傳矣君早歲詩橐經亂遺失存游燕集一卷詩餘一卷皆手寫未刊者

醉司命

粢餌膠飴紛餽飭清酒滿樽醉司命
司命酩酊登太虛俛伏青蒲口便佞兒女詬諍雞犬爭薪米猥瑣詞難竟
九重尊遠未及聞貴神揮去毋瀆聽風馬雲車齊下馳
神今億矣修神

祠盛益尊瓶皆古禮吉蠲有加錫汝釐東鄰老婦拜致辭我
民困苦非昔時追呼煩擾竭膏脂官吏大半飽其私鼠竊橫
行不敢咎大盜焚掠靡孑遺天高民隱奚自達但坐茅檐日
怨咨君今奏事係責守曾否奏與天帝知司命聞言重歎歔
吁嗟予職卑且微月享孟飯恆苦飢安敢越位陳民依君不
見嶽鎮廟貌何巍哉椎牛醢酒舞婆娑據案高坐無一語但
睹終日醉顏酡又不見赫赫天將氣鬱勃七寶兜鍪黃金鉞
狐虺盈前罔聞知恣索牲醪降譴罰大神環列不事事奈何
於予獨求備爾民莫笑神無能從來下位難行志嗟嗟下位
難行志胡爲歲薦黃羊受人媚

擬遊仙詩十首

錄五

八公山下駕雲駢白日相將上碧天莫怪劉安偏貴倨提攜

雞犬亦神仙

廿年辛苦上瑤池
輸卻斑龍去種芝
未必神仙真快樂
初平仍是牧羊兒

瑤笙吹徹步虛篇
縹緲青鸞拂紫煙
酌罷流霞無一語
衍波徒費上清牋

金闕標題紫府卿
苦爭資格是蓬瀛
青蓮小謫騎鯨去
未必瑤臺識姓名

眼看東海幾栽桑
擲米成珠也自忙
休訝紅塵饒白髮
麻姑兩鬢已如霜

詠史三十首

錄十

五兵鑄出駭洪濛
鐵額銅頭戰有熊
千古黃農傳郅治
當年妖霧已迷空

紅陳貫朽縣官儲土木神仙費有餘汗血乍看收宛馬脂膏
先擬算輶車

爛得羊頭便剖符登朝齊著繡檐榆漫言拜爵多廝養樊噲
當時亦狗屠

西邸新開競獻財冀州名士列中台將軍別唱天公號不向
鴻都買爵來

曲江屏斥任宗賢獨秉鈞衡二十年漫笑弄聲專省閤卻教
戎馬長幽燕

重輪赤仄鉛兼磨幣重爭如物貴何大將告身纔易醉官錢
不及酒錢多

金枷鑄就會平涼共道和戎福正長禮服登壇麾萬騎侍中
一走太蒼皇

江東金榜未書名苦勸錢王舉義兵賣國六臣梁殿舞都從
上第到公卿

賴有錢神可乞靈好官何似貫橫青一編論語工謀國贏得
廊閒海物瓶

避敵恩恩御小舟相公尙爲聽經留誰知誤國多天幸卻使
農卿去斷頭

俞聘三

字華農新昌歲貢

沃洲懷古

南明山畔路紆徐支遁當年此隱居馬騁坡前新雨後鶴歸
亭外夕陽初風光依舊人琴杳憑弔蒼茫歲月除千載名流
懷晉代更從何處款蓬廬

王紹祥

字芝生嵎諸生著靜觀室詩存二卷

題黃尊古唐人詩意圖

放舟曾過岳陽城風景真如畫裏行
霜後煙林忽疎密晚來山色半陰晴
江流闊處天容淨釣艇歸時夕照明
今日披圖一惆悵南湖東嶺未關情

題陸日爲畫冊

矮屋依孤與寒窗罩淺沙潮回魚欲上人影出蘆花
四山風泠泠流泉引清聽知音不可期攜琴下蘿徑
江路不知遠數峰相對閒舟人忽遙指深處是家山
雨餘石氣蒸風過泉聲續下有百丈潭倒涵襟袖綠

月樓第二集

依然傑閣俯奔湍此日應知會合難
烈火幸逃秦歲月諸生猶見魯衣冠
地從歷劫留奇勝天爲幽人續古歡
亦念少年

行樂耳憑闌休更發長歎

臥獅石

丙寅五月購於同里故家黃氏

巨靈擘山根破碎散川谷肖此猛獸形欲起勢還伏背轉脰
且圓腹蟠繚而曲低昂一嶺延顧盼兩崖蹙傲骨痠愈撐怒
筋紛可矚松小搖尾青苔古覆毛綠靈竅通天光真形鎮地
軸蕤沒韜毫芒洗濯駭心目奇觀古具陳異書舊曾讀金華
叱羣羊南陽鑿天祿變化矜神靈雕斲落凡俗遜此天巧成
慄欲百獸服貯之古銅盤注以懸岩瀑菖雨沐胡髯蘚紋齧
拳足凝睇懾嚴威娛情侈清福再拜呼作丈衣冠戒僮僕

兩浙輶軒續錄卷四十四